

# MAI OYO EBIMAKA NTANGO

## NYONSO NA LIBANGA



Tozongisi matondi na ntongo oyo mpo na Bozali ya Nkolo Nzambe, oyo ebandisi mayangani oyo na kopesakáká biso nsango moko, ete—ete tosengeli “koyoka, kozala na limemia” liboso na Ye, ete Azali na likambo moko ya koyebisa biso. Nandimisami ete Akosala yango, likambo oyo Ye alaki. Akokisaka ntango nyonso Liloba na Ye. Na boye tozongisi matondi ya kosangana elongo, na bomoi, na ngámbo oyo ya Seko na ntongo oyo, mpe kozala lisusu na makoki ya kosambela Nkolo, kosangana elongo mpe koyoka Ye. Yango nde ntina tosangani elongo, ezali mpo na mokano oyo mpenza.

2 Sikawa, na ndenge moko boye, nabimelaki Ndeko Neville, na mbálákaka, lelo, ezali mpo na ndóto moko oyo nalotaki. Ete . . . Nandimaka na . . . ngai . . . bandóto. Nandimaka ete Nzambe asálelaka bato na bandóto. Mpe nalótaki ndóto moko libanda na momesano mpenza, na butu liboso na lobi eleki. Ete, nazalaki kotambola na mopanzi ya ngomba, na mopanzi ya ngomba moko boye, kokende na esika moko ya kolia, epai nasengelaki kolia bilei na—na ngai ya moi. Mpe, ntango nakómaki pepene na esika yango, namonaki ete bazalaki kobeta miziki, orkéstre moko ezalaki kobeta miziki, ná ba-violon, mpe kosepelisáká bato, wana bazalaki kolia. Mpe eloko moko esalemaki kuna, oyo nasepelaki na yango te, na bongo nalekaki esika yango. Nakutanaki na moto moko oyo azalaki komata ngomba. Natálaki, mpe bato mingi bazalaki komata ngomba yango kino na esika ya kolia yango. Kasi nakende ki mwa moke mosika na bango, nabalukaki na ngámbo ya mobali, to, na ngámbo ya mwasi.

3 Mpe na lolenge moko boye, nakokaki komona tabernacle kuna na lobwaku. Nayokaki mongongo ya moto moko, alobaki: “Bókutana na Ndeko Branham na matákanelo boye na boye. Azali kokita na ngomba kuna. Bóyebisa ye likambo boye na boye.” Mpe nasálaki mbangu mpo nákóma na matákanelo yango.

4 Mpe ntango moto yango akomaki, ezalaki Ndeko Neville, alátaki kazaka na ye ya mwa moindo, azalaki kaka ndenge azali komonana afandi wana na ntongo oyo. Mpe alobaki: “Ndeko Branham, soki okozala na engumba,” alobaki, “ekozala ma—malamu ete óya, mpo Ndeko Hank . . .” Sikawa, Ndeko Hank bobele moko oyo nayebi, ezali Ndeko Henry Carlson, tobengaka ye Hank. Alobaki: “Akokaki komona yango ndenge ete óyáka lisusu mingi te na tabernacle, soki okozala awa na engumba, to

soki ozali kolekisa mwa mikolo na engumba.” Nalamukaki.

<sup>5</sup> Mpe, na yango, namiyokaki mpenza ndenge. Nalingaki te koya na mpwasa na ntango wana ya mpóso, na lolenge ete natunaki Ndeko Neville soki abongisaki likambo moko na ntongo oyo, mpo na losambo. Boye azalaki na boboto, lokola ntango nyonso, alobaki: “Yaka.” Boye, touti koya. Nabengaki ye lobi eleki na nsuka ya nsima ya nzángá, mpe nayeri na ntongo oyo, na mbálákaka epai ya moko na biso.

<sup>6</sup> Sikawa nakanisi ete ekozala, liboso, likambo moko malamumu, liboso, mpo na ngai ko—kolimbolela bino makambo mosusu mwa moke. Mpo na bato mingi, ngai nazalaka moto moko ndéngé mpenza. Mpo nazalaka mwa moke ndéngé, na ngai moko. Mpamba te, namekaka kolanda bokambami ya Molimo Mosanto, na pene mpenza ndenge nakokaka. Mpe yango ekómisaka biso bato moko ndenge, bomoni. Tosálaka makambo oyo, to—tofandaka mpenza mpe tomitunaka bantango mosusu: “Mpo na nini nasalaki likambo ya boye? Ndenge nini nakokaki kosala likambo ya boye?” Mpe na bongo mpenza okoki kokanisa ete osalaki mpenza likambo oyo osengelaki kosala te. Kasi soki ozali kaka na motema molai, mpe ozali na kondima, mpe ondimisami ete Nzambe nde akambaki yo kosala yango, okomona ete ekosuka na yango malamumu mpenza. Bomoni? Mpe mbala mingi tomonaka yango. Mpe nayebi ete Ndeko Neville asili komona yango, mbala mingi. Bakambi ná bato ya molimo mpe basósolaka yango.

<sup>7</sup> Esili koleka mwa ntango na bomoi na ngai ete... Na bosembo mpenza, uta bolenge na ngai, natikála koyóká te bokambami mpenza, ete nasengeli kofanda na—na Jeffersonville. Ezalaka ntango nyonso etumba, mpo na ngai, komeka kofanda awa. Liboso, nakokaka mpenza mopepe na yango te. Eloko mosusu, emonanaka lokola ezali na eloko moko oyo élembisaka molimo.

<sup>8</sup> Soki bokei koluka esika moko boye awa, soki ebébisamáki te na ntango ya mpela, ezali na mokanda moko na ntina na yango, oyo nazalaki na yango, ntango nabengamaki liboso na lotómo, namilengelaki mpo na kokende. Mpe Ndeko George DeArk ná ngai...

<sup>9</sup> Mpe mama ya Ndeko Graham Snelling, Ndeko Hawkins, oyo ayangelaka pómpi ya essence ya New Albany, ná bato mosusu mingi, bakutanaki na ngai na libanda ya mwa esika moko ya liyangani ya mabondeli awa. Mpe balobaki ata, ete soki natikali, bakolongola mwa lifuti na mbongo ya bilei ya bana na bango, mpo—mpo bátonga tabernacle moko, boye bákosengela te kotelengana bipai na bipai.

<sup>10</sup> Ntango nayokaki mama moke wana, oyo asimbacki bebe moko na loboko mpe moko mosusu na loboko na ye, koloba ete akosepela kolongola mwa lifuti na mbongo ya bilei ya bana na

ye, mpo bátonga esika oyo bakokaki kofanda mpo na kosámbela, elekelaki ngai mwa mingi koleka mpo na ngai koyikela yango mpiko. Boye Ndeko George ná ngai tosonianaki mpe tozuaki mokano ete tokotikala mpe tokotonga tabernacle yango.

<sup>11</sup> Mpe ntango tabernacle etongamaki, emonanaka ntango nyonso lokola...Na ntongo oyo nabulisaki tabernacle, emononeli moko eyaki, ekomámá mpe ezali na kati ya libanga ya litúmu kuna, ntango Molimo Mosanto alobaki na ngai: “Oyo ezali tabernacle na yo te.” Bomoni? Natunaki esika nini tabernacle na ngai ezalaki, mpe Afandisaki ngai na nsé ya likoló ya kongenga makasi. Na nsima, Alobaki: “Sálá mosala ya mopalanganisi-nsango-malamu,” mpe bongo na bongo, ndenge boyebi. Ekomámá kutu na babuku.

<sup>12</sup> Makambo nyonso wana esangani. Mpe mokolo moko ntango nazalaki kokáta matiti kuna epai Ndeko Wood akómi kofanda, mpe na ntango wana, mama-bokilo na ngai azalaki kofanda kuna; nafandaki na ebuteli ya nsima, mwa ebuteli moko ya betón, natongáka mwa ndako yango kuna mpo na mama-bokilo na ngai. Mpe azalaki lokola mopetoli ya ndako-a-nzambe na eleko wana, kobateláká yango. Mpe polele mpenza lokola moto nyonso akokaki koloba, Mongongo moko elobaki na ngai, elobaki: “Nakoki ata moke te kopambola yo ntango nyonso oyo okozala awa. Osengeli kokabwana na bandeko na yo mpe na esika oyo.” Ee, ngai, ebukaki ngai nzoto, pene na mpóso moko to koleka.

<sup>13</sup> Ntango nyonso, mbala nyonso, Eloko moko ezalaki kokebisa ngai: “Kende mosika, kende mosika. Kende na ngámbo ya westi. Kóba kokende na westi.” Ee, ngai...Etungisaka ngai ntango nyonso. Mpe ntango nyonso, emonanaka lokola...

<sup>14</sup> Sikawa, nayebaki malamau na likanisi na ngai ete na mpóso oyo nalingaki kokende na Tucson, na mpépo, epai nasengelaki kofutela esika moko, mpo na kozala kuna na eleko ya malíli makasi oyo; mpo na kokomisa bana na kelasi, kobanda na sánzá ya Libwa. Nazuaki esika yango. Bapesaki ngai ata esika moko kuna. Kasi eloko moko ezali ete...Mpe—mpe soki nakei mosika...

<sup>15</sup> Likambo mosusu ezali, oyo nakolinga koloba. Kaka liboso tótonga ndako oyo awa, ndako ya mokengeli, esika ezali sikawa, ngai nalingaki kotonga kuna te. Mama ya mwasi na ngai akómaki mobange. Mpe mwasi na ngai azalaki ata kolela na ntina na yango, alobaki: “Nakoki kotika mama awa te, koyeba ete akómi mobange, mpe ntango mosusu bakokoka kobatela ye te.” Ee, nasósolaki yango. Nasósoli. Azali mama na ye, mpe mama bobele moko oyo atikálá kozala na ye, to akozaláká na ye. Boye, nasósolaki yango. Boye, na—nabondelaki Nkolo, nalobaki: “Nkolo, lokola ngai nasepelaka na esika yango te,” nalobaki, “sálá ete názala na esengo. Nakokende bisika nyonso

oyo Okolinga ete nákende, ata esika nini. Kasi nalingi koyokisa mwasi na ngai mawa te, mpo na kolongola ye awa, komema ye na mboka mosusu, epai ayebi moto moko te. Mpe lisusu nakendeke ntango nyonso na mibembo, ata bongo. Sala ete názala na esengo ya kozala awa elongo ná ye.”

<sup>16</sup> Sikawa, ntango mama na ye azuámáki, mpe asili kokende na Nkembo, na bongo tala mposa yango eyei lisusu, bomoni, sikawa ya kokende. Nayebi te nini kosala.

<sup>17</sup> Na bongo mokolo mosusu wana, ná malakisi oyo bandeko babandáki komema bipai na bipai, natélémati na eteyelo mbala ya nsuka oyo nazalaki awa mpe nayebisaki bino ete nakozala na elanga te na ntango nyonso oyo likambo yango ekozala kokóba. Boye, bandeko yango basébolaki makambo nyonso wana na boboto. Nyonso ekómi polele. Na ngonga ntuku mibale na minei, nyonso wana esilaki.

<sup>18</sup> Sikawa yango efungoli lisusu elanga mpo na ngai. Nayebi te nini kosala. Nayebi te ngambo nini kobaluka. Naséngaki emononeli epai ya Nkolo. Naséngaki Ye áyebisa ngai nini kosala. Kasi Atiki ngai kaka nafanda bongo.

<sup>19</sup> Sikawa, lobi na mpokwa, ntango nasálaki ete bana nyonso bákende, mwasi na ngai mpe bango nyonso, bázala ndako te, nasalaki elaka moko epai na Nkolo Nzambe. Nalobaki na Nkolo Nzambe ete: “Soki Okopambola ngai na nzela oyo nakolanda, nakosalela Yo. Kasi Okosengela kolakisa ngai epai wapi kokende, lolenge nini kokende, mpe nini kosala.” Na bongo, namípesaki na elaka epai na Nkolo. Ná—ná lotómo mpe nyonso, napésaki yango epai na Nkolo. Mpe nalobaki: “Esika nyonso oyo Okofungola, nyonso oyo Okosala, nakolanda nzela yango. Liboso Ófungola nzela, nakokóba kosala ndenge nazali kosala kino ntango Okofungola nzela.” Mpe naséngaki na Ye ete átalisa yango polele mpenza na lolenge ete námikosa lisusu te, mpo nandimi solo ete tokómi mpenza na matákanelo ya likambo moko oyo ekosálema.

<sup>20</sup> Nayokaki Ndeko Neville kosakola yango na ntongo oyo, to koloba yango, nayebaki ete ezalaki—ezalaki lisakoli, oyo ye azalaki kolobela. Sikawa, na yango, nabondelaki mpo na bino nyonso, mpe nazali na bosenga ete bino nyonso bóbondela mpo na ngai, mpo Molimo Mosanto ákamba ngai mpenza esika nini nasengeli kokende, mpe eloko oyo nasengeli kosala, mpo násala libunga te.

<sup>21</sup> Bomoni, mbala mingi, bato bakanisaka ete kozala na likabo ya lisakoli, ete Nzambe akoloba ete “Nakokamata yo *awa*, mpe Nakotia yo *awa*. Sikawa kende kaka na ngámbo *oyo*.” Kasi Ayébisa yo makambo nyonso wana te. Soki Asalaki yango, boye olingaki kozala na kondima ya kolóna nini? Bomoni? Bomoni, yo, Asalaka ete ótikala yo moko, koleka bato mosusu nyonso. Bomoni? Bino nyonso bokoki koya kotuna makambo epai na

ngai, mpe Azángá naino ata mbala moko te ete Ápesa bino biyano. Ezali solo. Iyo. Kasi ngai nakoki kosenga Ye makambo mpo na ngai moko, mpe mbala mingi, Asalaka ete nátíkala ngai moko, bomoni, kotika ete nákoba kokende liboso mpe nákota na likambo yango.

<sup>22</sup> Nazali na makambo, sikawa, oyo nasengeli kosilisa yango ngai moko, mpe mikano nasengeli kozua. Mpe likambo oyo ezali mpenza na motuya monene, na lolenge ete nakoki mpenza kosala yango te, soki nandimisami te ete Ye nde azali koloba na ngai. Mpe na—na . . . Akopesa ngai emononeli te. Atiki ngai kaka ngai moko. Boye, nafandi na ngai lokola mwana etíké, tóloba, na ntongo oyo, na—nayebi te nzela nini nálanda. Boye, napesi yango epai ya Nkolo.

<sup>23</sup> Ntango nalótaki ndoto yango, na—nayokaki lokola nasengelaki kozonga awa na tabernacle mpo na kosunga Ndeko Neville kino likambo mosusu ésalema nzela nzela. Boye, nakozala awa alongo.

<sup>24</sup> Natunaki Ndeko Neville kala mingi te: “Lingomba ezali kokóba ndenge nini?”

Alobaki: “Malamu.”

<sup>25</sup> Na bongo nayoki ete bozali na makabo ya molimo kino lelo, ná makambo mosusu katikati na bino, oyo ezali kosala, makabo ya lisakoli, ná—ná minoko na sika, mpe ndimbola ya minoko na sika, oyo touti koyoka kala mingi te. Mpe makambo yango eléndisaka lingomba, mingi mpenza.

<sup>26</sup> Kasi namilobelaki, ntango mosusu na mpokwa ya lelo nakoki, soki Ndeko Neville. . . Soki Molimo Mosanto akambi biso na likambo mosusu te, na mpokwa oyo, nakolinga kosala. . . Bino nyonso, liboso bókende na ntongo oyo, nakolinga ete bócoma mituna mpe bótia yango awa, mituna oyo ezalaka na makanisi na bino, mpo tóyeba eloko nini lingomba ezali kokanisa. Yango nde, tóloba, ndenge basalaka mpo na koyeba mpenza eloko oyo ezali na mitema ya bato. Mpe moto nyonso kati na bino, oyo azali na motuna, ákoma yango mpe átia yango awa. Soki ozali na eteni ya lokasa te mpo na—mpo na kokoma yango na ntongo oyo, na bongo, koma yango na ntango malamau, na mpokwa. Boye, nakolinga kozuela yango mpenza ntango oyo nakoki kozua, mpo na koyekola yango mpe koyanola bino kokokana na Makomi.

<sup>27</sup> Na nsima, soki Nkolo alingi, soki ezali mokano ya Nzambe, nalobaki likambo moko awa eleki ntango molai te, ete nakolinga kosolola na bino na ntina na Bilembo nsambo ya nsuka ya . . . ya Emoniseli. Sikawa soki biso. . . Nakokaki kolobela Bilembo nyonso wana te, na mobu oyo, mpo ekokamata longwa na mokapo ya 6 ya Emoniseli, kino na—kino na mokapo ya 19, mpo na kosilisa Bilembo yango nyonso. Kasi Bilembo misato to minei

ya liboso ekoki koyanolama na mpokwa moko, nakanisi, Elembo moko na mpokwa moko.

<sup>28</sup> Sikawa, soki tosósoli, bomoni, epai tosukaki, na Buku oyo ya Emoniseli, epai Lingomba enétolamaki na Nkembo, bongo oyo etikali ezali kotala Bayuda, etali Lingomba ata moke te. Ezali kotala ekólo ya Bayuda. Yango wana tosengeli kozonga nsima, kobanda na Konétolama ya Lingomba, mpe kozua. . . Tomoni awa makambo oyo ekosalema na ntango ya Bilembo yango, mpe na ntango ya Lingomba ya Mabota. Lingomba esili kokende; mpe na oyo etali ekólo ya Yisraele, tozongi nsima mpo na kolobela Yisraele kobanda ntango batikaki bango, kino na mikolo oyo; ná boyei ya Masiya, ntango bakoyamba Masiya.

<sup>29</sup> Sikawa bosósoli yango? Lingomba enétolami. Nzambe asálaki liboso na Lingomba, Bileko ya Lingomba. Toyékolaki yango. Na bongo Lingomba enétolami na Nkembo. Na nsima Molimo Mosanto azóngi mpo na kozua Yisraele, lokola ekólo. Mpe amemi yango kino awa, wana Elambo ya Libala ezali kosalema, na nsima bazongisi Bango lisusu, na nsuka ya ntango yango. Nakotia etánda na ngai ya moindo awa, mpo nákoka koyema yango mpe koteya yango, ntango ngonga yango ekokoka. Na nsima Nkolo akozonga elongo ná Mwasi na libala, mpe Yisraele akomona Ye-mwasi. Mpe, oh, ekozala ntango malamumu mpenza!

<sup>30</sup> Sikawa, liboso tókoka kosangisa yango malamumu, ezali na liteya moko monene, oyo ezali libanga ya libaku mpo na bathéologien mpe bato mingi, ná balakisi kati ya bileko, mpe bato ya Eglise de Christ ná baoyo bayáka koyoka likambo oyo, ezali nde, Mpóso Ntuku Nsambo ya Daniele. Tozali na . . . Tokoki kokende mosika te, na Emoniseli, kozánga kosangisa Mwasi na libala ná Yisraele elongo ná Mpóso Ntuku Nsambo ya Daniele. Mpe ntango mosusu, soki Nzambe alingi, mpo, soki Asengeli kosolola na ngai na mikolo ekoya, mpo na koloba likoló na biteni ya Mpóso Ntuku Nsambo oyo . . . to, Mpóso Ntuku Nsambo te, kasi Bilembo nsambo ya nsuka. Na bongo Lomingo ekoya, nakomeka kozua Mpóso Ntuku Nsambo ya Daniele, na Lomingo ekoya, soki Nkolo alingi. Na bongo yango ekofungola nzela na ntango wana, soki Asengeli kokamba biso, mpo na kolobela misusu wana. Boye, tokomona ndenge ekokendela kobanda na wana.

<sup>31</sup> Ndeko Neville ná ngai tokosala elongo mpo na yango, mpe tozali kosala nyonso oyo tokoki kosala mpo na bolamu ya bato.

<sup>32</sup> Sikawa, mbala nyonso oyo tokozonga awa, tokobondela mpo na babéli, tozalaka ntango nyonso na esengo ya kosala yango. Mpe ntango mosusu nakosala yango na mayangani nyonso, soki bato bazali na bokono, kobondela mpo na bango.

<sup>33</sup> Nalingi lisusu na mposa te ya kosala mosala ya kosósola makanisi. Bomoni, sikawa bóyoka likambo oyo esalemaki.

Namekaki. Mpe nayebi ete nasilá kosala makambo oyo esengeli te; kasi namekaka kobika pene mpenza na Nzambe, ntango nyonso, mpembeni na Nzambe, nde ndenge wana bimónoneli yango esálemaka, ndenge yango ekomaka. Ata bato oyo babúngisaka biloko, mpe babéngaka ngai, baséngaka ete nákende kobondela Nkolo, mpo na kotúna soki ezalaki wapi. Lokola Yisai, abungisaki bambalata-mpunda, mpe bana na ye ya mibali bakendeke kokutana na mosakoli, mpe ayebisaki bango ete bambalata-mpunda yango basilaki kozonga na ndako. Mpe bongo na bongo ndenge wana, yango ezali malamumu be mpenza. Kasi ekómaka mpenza mingi, bato mingi mpenza. . . Ezali lisusu likambo ya mboka moko lokola oyo te; ekómi likambo ya mokili mobimba, bomoni. Boye, ekómi, ebukaka ngai nzoto ntango nyonso, na nsima epesaka ngai bozito ntango nyonso, na lolenge ete ekómi na esika oyo. . .

<sup>34</sup> Yango nde esalaki ete bandeko yango bápanganisa malakisi yango, ete ngai nazalaki Nkolo Yesu Klisto oyo alati nzoto. Mpe toyebi ete elingaki kobébisa mpenza Lotómo mobimba, mpe koyókisa Klisto nsóni mpe nyonso wana. Bomoni? Boye, yango wana nasengelaki kosukuma bango makasi mpenza, mpo na kosukisa likambo yango mbala moko, koyebisa bango ete wana eutaki na Nzambe te, ete eutaki na zabolo. Bomoni? Kasi bazali bato malamumu. Mpe elakisaki ete bato yango babotámá mbala mibale na Molimo na Nzambe, mpamba te, ntango bamónaki Sólo na nzela ya Makomi, bazóngaki epai na Nzambe, ya solo mpenza, bomoni, na mbala moko. Boye, elakisaki ete Satana nde azalaki koluka kosala likambo moko ná bato yango; bango nyonso bazalaki bato na Nzambe, Baklisto.

<sup>35</sup> Mpe esálaki ete mingi kati na bango balobaki na ngai: “Ndeko Branham, sikawa totieli yo lisusu motema mingi koleka liboso.”

<sup>36</sup> Mpo bomoni, eloko nini, ná likabo oyo Nzambe asili kopesa ngai, eloko nini nakokaki kosala ná yango? Ekokaki kotia ekólo mobimba na makolo na ngai, to, bato nyonso. Oyo biso tobéngaka *ekólo*, ezali “kosmos” oyo te, oyo—oyo esengeli kokufa mpe nyonso wana. Nalingi koloba Baklisto, bandimi ya solosolo, baoyo ya malamumu koleka. . . Ntango tolobelaka *ekólo*, toteyaka nde “bato oyo babotami mbala mibale,” bango nde tolobelaka, ntango tolobaka ekólo. Ezali bato nyonso wana te, ezali baoyo ya mbindo ná bosoto mpenza, baoyo tobikaka na bango na mokili, bango bazali—bazali kaka putulú ya mabelé oyo ezozonga na mabelé. Nazali kolobela nde Baklisto oyo babotami mbala mibale, bato oyo bazali Baklisto ya solosolo.

<sup>37</sup> Nazali kozela ete moto moko ápumbwela ngai lisusu mpo na likambo moko. Moto moko ayáki epai na ngai kala mingi te, mpe alobaki: “Likanisi mpenza, ete Klisto abwákaki nsói na mabelé, ná nsói na Ye, mpo na kosangisa potopoto mpe kopakola yango na miso ya moto moko.” Alobaki: “Ezalaki mpenza mbindo,

bosoto, mpo na Ye kobwákaki nsói, ná nsói na Ye euti na monoko na Ye! Ezalaki mpenza salité, kobwáka nsói na mabelé, kosála potopoto mpe kopakola yango na miso ya moto.”

Nalobaki: “Kasi afungwamaki miso.” Bomoni, ezali bongo.

<sup>38</sup> Mpe mobali yango moko! Bafungoli molako moko ya bato ya bolumbu kuna, mpembeni na esika na ngai, boyebi, pisíne. Mpe—mpe mobali yango asombaki tiké mpo bana na ye nyonso bákende kosukola kuna, na pisíne yango. Ye ná mwasi na ye mpe bakendeke na pisíne yango. Bólimbisa ngai, bandeko na ngai ya basi. Kasi esika oyo pene na basi mokama, to nkama mibale, basukolaka na pisíne yango kuna, mikolo nyonso; basi, ná bosoto ya ndenge na ndenge mpe nyonso wana, basi ya lelo, mpe bákosukoláká kati na mai yango, ná bosoto mpe mbindo yango ekotaka na minoko na bango, komeláká yango mpe kobwakáká yango. Nalingi ete ápumbwela ngai, bomoni.

<sup>39</sup> Balobaki: “Soki—soki Klisto azalaki na bomoi lelo, balingaki kokanga Ye mpo na likambo ya salité.”

<sup>40</sup> Bolobi nini mpo na *oyo wana*? Nandimisami ete bososoli eloko oyo nalingi koloba. Bakendeke na pisíne yango, mpe mingi kati na bango bazali na maládi, ya syphilis, ya gonorrhée, ná nyonso wana, kuna na kati. Mpe komisakáká yango na monoko, biloko ya ndenge wana, mpe basukolaka na kati na yango ndenge wana. Mpe oyo wana nde bopeto mpenza?

<sup>41</sup> Boye, oh, la la, mokolo nini oyo tozali kobika kati na yango, ndeko mobali, ndeko mwasi! Ntango ekoki mpo ya Boyei na Nkolo! Mpe Lingomba ezali kaka na elikya moko, yango ezali nde Boyei na Nkolo.

<sup>42</sup> Ee, nakoki kosilisa makambo yango te; ezali na ntina moko te. Biblia elobaki yango liboso, ete ekozala awa. Nakoki kopekisa yango te. Kasi nalingi ete mongongo na ngai étiana na bande na Likoló, ete natélemelaki yango, ntango ngonga ekokoka mpo na Kosambisama. Natelemelaki yango.

<sup>43</sup> Nandimaka kino lelo ete Biblia oyo ezali Liloba na Nzambe. Boye ezali na eloko mosusu te na mokili, oyo ekeseni na Yango, oyo ekoki ata kopekisa Yango. Kasi Biblia oyo, oyo nde ezali Solo, oyo nde ezali Liloba na Nzambe. Boye, sikawa tóbenda bilamba na—na—na biso ya masuwa, mpe tóbwaka lóngo mwa moke na ngámbo ya kimia ya Libongo ya Kopema. Mpe—mpe tokoki komatisa yango lobi mpo tókende epai mosusu, kasi tóbwaka lóngo sikawa, mpe tóyoka Mongongo ya Tata na biso na Likoló, wana Akosolola na biso na nzela ya Liloba na Ye lelo.

<sup>44</sup> Mpe lelo na mpokwa, sikawa, bóbongisa mituna mike nyonso oyo bozalaka na yango. Sikawa, ézala te eloko oyo ekosala moninga mpasi. Soki osali yango, na bongo ezali . . . Nakoyanola na oyo wana te, mpo na kobanda, bomoni. Kasi bino, *eloko moko to mosusu*, ndakisa: “Ee, sikawa, soki nasáli likambo moko boye, Nzambe alobi ete tosendeli kosala yango?” To, boyebi, mwa



mituna oyo ezalaka na mitema na bino. To, “Tozali na makabo oyo ezali kosala elongo ná biso, Ndeko Branham, tosengeli nde kosalela yango lolenge *oyo* to lolenge oyo *wana?* To, tosengeli kosala nini?” Eloko oyo nakoki koyanola bino na Makomi, bomoni. Bókoma eloko moko ya moke. Nakosepela. Mpe soki ata moko ezali te, na bongo nakozua kaka motó ya liteya moko boye, mpe nakoteya bino yango na mpokwa ya lelo, soki Nkolo alingi. Lelo ezali mokolo ya Lomingo, mpe nazalaki. . .

<sup>45</sup> Lomingo eleki, nabandaki kokende epai ya Ndeko Cauble. Kasi nayokaki ngonga ya ndako-a-nzambe oyo kobeta, mpe nabandáki kotambola-tambola na kati ya lopambo. Nakokaki koyikela yango mpiko te. Esilaki. Nayokaki bino, na bongo na—na—nasengelaki kaka koya awa.

<sup>46</sup> Boye, sikawa tógumba mitó sikawa mpe tósolola na Mokeli na biso, boye, na liloba ya libondeli. Moto moko azali na lilombo ya ndenge mosusu? Bótómbola kaka maboko, bóloba: “Ngai. . .” Bótalisa yango kaka. Nzambe ayebi oyo ezali na motema na yo. Sikawa, bátela kaka bosenga na yo na makanisi.

<sup>47</sup> Nzambe oyo aleki Bulee, Oyo akeláki Likoló ná nsé na Liloba ya monoko na Yo, na makanisi ya mayele na Yo, toyei Liboso na Yo, na nzela na Yesu Klisto, Nkolo na biso, mpo na kopesa Yo matondi mpo na nyonso oyo Osili kosala mpo na biso. Mpe tozongisi matondi mingi epai na Yo, Nkolo, na ntongo oyo, mpo na koyeba esika nini tokómi, mpo na koyeba esika na biso na ntongo oyo, mpe lisoló ya ntango, ná makambo oyo ekoya nsima. Koyebáká lelo, na ngolu na Nzambe, ete tosukolami na Makila ya Kalvari, ete tobélemi, ná kondima na mitema na biso, mpo na kokutana ná Ye soki Asengeli koya lelo. Tosengeli koloba: “Ata bongo, yáká, Nkolo Yesu.”

<sup>48</sup> Mpe tozali komona masumu kofuluka, na lolenge ete ekómi lokola mokili ezali kotenga-tenga likoló na masumu. Ndenge komela masanga, kobeta masano ya mbongo, kosala biyenga, kotambola bolumbu, mpe, E Nzambe, bosoto, ná mbindo ná salité ya bato. Mpe ndenge bango, soki bakokaki bobele kosósola, Nkolo! Bato yango, oyo balátaka ndenge wana, mwa bilamba oyo ezánga bomoto, mpo na kobima kuna na balabala, bazali koyeba ete bazali bobele bankusú mpe putulú, oyo ntango mosusu nsima na mpóso moko, bankusú ekolaza kolia nzoto yango, oyo bazali kokumisa mingi? Bayebi nde ete bankusu ekolia nyonso wana, mpe elimo na bango ekozala kuna, na Seko-na-seko, kozanga Nzambe, kozanga Klisto, kozanga elikya, kozindáká na bozindo ezángá elikia, mpo na kolimwisama mpenza na Boyei na Ye? E Nzambe, pésa biso mingongo ya—ya likebisi, mpo tókoka kokebisa elimo nyonso na ntina na likama oyo ezali kobeleva.

<sup>49</sup> Zala na biso lelo. Pesa biso “maloba ya bwanya,” ndenge Salomo alobaki mokolo moko, na Mosakoli, ete tokozala

“batongi ya bwanya,” ete tokozala “babateli-mpate ya losambo oyo.” Mpe tobondeli, Nkolo, ete, wana tokoluka maloba ya koloba, ete ézala—ézala misala mibongi be, oyo ekosimba mitema oyo ezali mpenza na bosenga mingi awa, na ntongo oyo.

<sup>50</sup> Toyei te kosangana na nsé ya motóndo ya molunge oyo lelo, kaka mpo bámona biso, kasi toyei awa mpo tolingi Yo, mpe mpo tozali na mposa makasi ya koyoka Yo. Yo ozali Bolingo na biso oyo tolingaka, mpe tozali na mposa makasi ya koyoka Maloba na Yo. Tozongisi matondi mpo na oyo tosili koyoka. Ekoúmelá ntango molai kati na biso. Sikawa pesa biso eteni oyo Obómbelaki biso lelo, wana tozali kokóba kotálela Yo. Tosengi yango na Nkombo na Yesu, mpe mpo na Ye. Amen.

<sup>51</sup> Sikawa ezali. . . [Ndeko mwasi moko alobi minoko na sika, ndeko mobali moko alimboli—Mok.]

<sup>52</sup> Tozali kozóngisa matondi mpo na komemama oyo kouta na Molimo, bayebisi biso mpe bakebisi biso ete tóyoka na bokebi Maloba ete ntango mosusu Molimo Mosanto akoloba na biso lelo. Mpe toyebi mpenza te nini Ye abómbeli biso, kasi toyebi mpenza ete esengeli kozala na likambo moko oyo Ye akosala. Ekoki kozala motuna moko na molimo na yo, Akolobela yango na kati kuna. Akoki kolobela yango na nzela ya Liteya na ntongo oyo. Akoki kolobela yango na mpokwa ya lelo na liyangani. Ye, na esika moko boye lelo, emonani lokola Azali koluka kokebisa moto moko mpo ásósola Maloba yango.

<sup>53</sup> Sikawa mpo na kofungola Liloba likomami, tókende na Buku ya Esode, mpo na liteya ya Ecodim.

<sup>54</sup> Bozali na mosala ya libatisi? [Ndeko Neville alobi: “Te, kino na ngonga ya motoba na mpokwa.”—Mok.] Te. Mosala ya libatisi ekosalema na ngonga ya motoba na nsima ya nzánga ya lelo.

<sup>55</sup> Tókende na mokapo ya 17 ya Esode, mpe tóbanda na—na molongo ya 5, nabanzi, milongo ya 5 mpe 6 ya mokapo ya 17 ya Esode.

*Yawe alobelaki Mose ete, Leka liboso na bato mpe kamata mikóló mosusu ya Yisalaele ná yo elongo; kamata mpe lingenda ebetaki yo ebale na yango mpe kenda.*

*Tala, Nakotelema liboso na yo. . . likoló na libanga epai na Olebe; mpe. . . okobeta libanga yango, mpe mai ekobima na yango ete bato bámela. Mose mpe asalaki kobong na miso na mikóló na Yisalaele.*

<sup>56</sup> Sikawa soki nasengeli kobenga yango mwa liteya ya Eteyelo ya Lomingo, mpo na liteya ya ntongo oyo, nakosepela kozua motó ya liteya oyo: *Mai Oyo Ebimaka Ntango Nyonso Na Libanga.*

<sup>57</sup> Toyebi ete Yisraele ezalaka ntango nyonso ndakisa ya lingomba na histoire. Mpamba te, Yisraele ezalaki libota ya

Nzambe liboso bábima na Ezipito, na nsima, bakómaki lingomba ya Nzambe mpo bakabwanaki na mabóta nyonso ya mokili.

<sup>58</sup> Na ntango tokabwani na nyonso ya mokili, na ntango wana nde tokómaka lingomba. Kasi na ntango nyonso oyo tozali komisangisa ná nyonso ya mokili, na ntango wana tozali na kati ya lingomba te. Sikawa, nazolikia ete yango ékota na bozindo mpenza, ete ézua esika na yango. Bomoni, tozali lingomba te, kino tókabwana na mokili. Tómkabola, tóbima katikati na bato ya mbindo, tósangana ná bango te, mpe tósangana ná masumu na bango te. Bókangana te ná bazangi kondima, kasi bókabwana na makambo ya mokili.

<sup>59</sup> Ntango Yisraele azalaki na Ezipito, bazalaki libota ya Nzambe. Na nsima, ntango babéngamaki libanda, to basáláki esóde, kobima, bongo nde babéngamaki lingomba, mpo, na ntango yango nde bakabwanaki ná mabota nyonso ya mokili.

<sup>60</sup> Mpe liloba oyo *lingomba* elingi koloba “abéngami kobima.” *Esode*, “kobima.” Moko na moko na biso, lokola Baklisto, asílá kosala esode na bomoi na biso. Na ntango moko boye, tobénganaki kobima katikati na baninga na biso, tobéngamaki kobima katikati na bato oyo tozaláká kosangana ná bango, mpe tokómaki bato ya ndenge mosusu, mpo na kotámbola elongo ná bato oyo bazalaki na bizaleli ya ndenge mosusu ná masolo ya ndenge mosusu. Ezalaki esóde na bomoi na biso.

<sup>61</sup> Ndakisa moko kitoko mpenza oyo Yisraele apesaki biso, ntango Nzambe abéngaki bango kobima. Bazalaki na esóde, babimaki longwa na—na mabota ya mokili, mpe bakómaki ekólo oyo ekabolami, mpo na Nzambe, libota ya ndenge mosusu. Batambolaki na nsé ya elilingi ya ebóngá-na-mawa. Bafándaki mpe batámbolaki mpembeni ya Likonzi monene ya Móto. Mpe Nzambe amemáki bango longwa na Ezipito, kino na mboka oyo Alakáká bango.

<sup>62</sup> Mpe, na esode oyo, bapésamáki mokambi moko ya molimo, mokambi moko, oyo ezalaki Mose, mosakoli monene oyo apakólamaki, oyo azalaki mo—moto monene. Azalaki mosantu, abotamaki mosantu. Nzambe abéngaki ye longwa na mama na ye, kutu liboso ya ntango wana; Nzambe abongisáká ye liboso na kozalisama ya mokili, mpo na kozala mokambi na ekeke yango, mpo na komema esóde oyo epai na bato.

<sup>63</sup> Eleki mwa ntango awa, nasololaki ná bana mike awa na tabernacle, mpe nateyaki bango liteya moko ya moke; mpe nayébisaki bango, to napesaki bango mwa etaliseli moko ya Yokebede, ndenge azaláká kobóndela, ye ná Amirame, tata ya Mose, mpo na kosala likambo moko na ntina na kokangolama ya libota. Mpe Amirame amonaki emononeli ya Nzambe ateleme, to Mwanje, kotalisáká ye ngámbo ya nórdi, mpe ayebisaki ye likambo oyo ekosalema. Bongo bebé Mose abotamaki. Mpe babángaki mibeko to bokáneli ya mokonzi te. Bayébaki ete

Nzambe atiáki loboko na Ye likoló na Mose, mpe yango ekátaki likambo. Ya solo. Etali te oyo mokonzi azalaki koloba, oyo politiki ezalaki koloba, oyo moto nani azalaki koloba, bango bayebaki ete Nzambe atiáki loboko na Ye likoló na Mose. Boye babángaki te mpo na kosundola ye, katikati mpenza ya bangando; na ntango oyo bakómaki minene mpenza koliáká bana mike ya Baebele, epai oyo baleisaki bango lokola bilei na bangando kuna. Nzokande Mose atiamaki na kati ya mwa masuwa moko mpe batindaki yango mpenza katikati na bangando, mpenza katikati na bango. Mpamba te, babángáki eloko moko te, bayebaki ete Nzambe atiáki loboko na Ye likoló na Mose.

<sup>64</sup> Ee, sikawa, soki tokokaki bobele koyeba likambo yango moko, ete Mokambi na biso monene, Molimo Mosanto, Nzambe asili kotinda Ye, Azali Mokambi na biso, mpe ata mokili elobi nini, mpe boniboni bazali koseka yo mpe kotiola yo, biso tokolanda Mokambi na biso! Nzambe atindaki Molimo Mosanto mpo na kozala Mokambi na biso. Bomoni? “Nsima na ntango moke, bamokili bakomona Ngai lisusu te. Kasi bino bokomona Ngai, mpo ete Nakozala elongo na bino, ata kati na bino, kino na nsuka ya mokili.” Boye, Mokambi na biso monene azali elongo ná biso, Molimo Mosanto. Sikawa tosengeli kolanda Mokambi oyo mpe kosala mpenza ndenge Ye alobi tósala. Mpe Mokambi oyo akobimisa biso na nzela ata moke te, Akobatela biso ntango nyonso na kati ya nzela moke ya Makomi. Kasi Akokende ata moke te na ngámbo *moko* mpo na eloko moko, mpe na ngámbo *oyo* mpo na eloko moko. Akotikala kaka sémba na nzela ya Makomi.

<sup>65</sup> Mpe Mose azalaki na nzela moko oyo asengelaki komema Yisraele, bongo kolanda mpenza kino kokatisa Mbu Motane, kokatisa mpenza Yaladene, kino na mboka ya elaká, kokatisa mpenza na kati ya lisobe. Ezalaki Mose te nde abimaki na molongo. Ezalaki Nzambe te nde abimaki na molongo. Bato nde babimaki na molongo, nde basalaki mobulu. Boye, tókanisa naino makambo oyo sikawa. (Bólimbisa ngai.)

<sup>66</sup> Mose, lokola mokambi oyo apakólami. Sukasuka, ntango alakisaki epai na bato, na nzela na bilembo mpe bikamwa, ete kaka Nzambe nde akokaki kosala yango, asalaki bilembo mpe bikamwa oyo liboso na bampaka ya Yisraele, mpe liboso na Yisraele, na lolenge ete bandimisamaki ete Mose oyo nde azalaki mopakolami oyo asengelaki kobimisa bango na ekólo yango, kino na mboka kitoko oyo elakamaki mpo na bango. Na bongo ntango bamonaki makambo minene oyo Mose asálaki na nkombo na Nzambe, babelemaki mpo na kolanda ye. Mpe abimisasi bango, akambáki bango kino na ngámbo ya Mbu Motane, bakátisaki yango, na mabelé ya kokauka, mpe na mobembo kati na lisobe elingi koloba na ntango ya mimekano.

<sup>67</sup> Ntango moto ayambi Klisto lokola Mobikisi na ye, nyonso

etámbolaka mpenza malamau. Kasi, liboso moto yango ákoka kokóma na libatisi ya Molimo Mosanto, moto yango asengeli liboso koleka na mosala ya kobulisama. Asengeli koleka na ntango ya mimekano na bomoi na ye. Bino nyonso bolelaki na yango. Alekaki na ntango ya mimekano oyo. “Mwana nyonso oyo ayáka epai na Nzambe, abétamaka naino fímbo, abétamaka mpe azuaka etúmbu. Mpe soki tokoki koyíkela etúmbu yango mpiko te, boye elakisi ete tozali bana na Nzambe te; tozali bana-makango, kasi bana na Nzambe te,” Biblia elobi. Kasi soki tokoki koyíkela etúmbu mpiko, koyebáká ete “nyonso etámbolaka elongo mpo na bolamu ya baoyo balingaka Nzambe,” boye tozali bana mibali mpe bana basi ya Nzambe, bongo Akokanga biso na elembo ya Molimo Mosanto kino mokolo ya lisiko na biso. Bomoni, wana nde koleka na etúmbu, momekano, likambo tolekaka kati na yango.

Mpe Yisraele, lokola etaliseli na histoire, asengelaki kozua etúmbu oyo.

<sup>68</sup> Sikawa, ntango bazalaki na Ezipito, Nzambe atindaki Mose. Asémbolaki lingenda, mpe mayanzi ná nsili eyaki na mabelé. Asémbolaki yango na ngámbo ya moi, mpe elálaki. Asémbolaki yango likoló na mai, mpe ekómaki makila. Ee, Yisraele ezalaki kuna na Kanana . . . kuna na—na Gosene, bazalaki na bango kolekisa ntango moko ya nkembo; moi etikalá kolala te, malozi etikalá kobeta bango te; ee, bazalaki mpenza kolekisa ntango moko ya nkembo!

<sup>69</sup> Kaka ndenge osálaki, ntango obíkísamaki mbala ya liboso. Makambo nyonso, bandeke bakómaki koyemba ndenge mosusu, mpe bato nyonso bazalaki malamau. Mpe, oh, la la, makambo nyonso ekómaki mpenza kitoko mingi, ntango bobíkísamaki mpo na mbala ya liboso! bongo ntango ya komekama eyáki, ya bitúmbu, ntango ya kobulisama, komibulisa na makambo ya mokili, “kokitisa mikumba nyonso oyo ezingaka bino na pete”. Yo, mobali, osengelaki kotika komela makaya, kotika komela masanga, kotika kokende kobeta lisano ya billard, kotika kobeta lisano ya kálati butu mobimba. Makambo nyonso wana, osengelaki komibulisa na yango, na nzela ya bondimi na Makila ya Yesu Klisto. Komibulisa! Bino basi bosengelaki kotika suki na bino ékóla, koyeisa ba-robe na bino milai, mpe kozala na bizaleli oyo ekeseni na oyo bozaláká na yango. Ntango ya komibulisa! Mbala mingi, batombokaka mpe bazóngaka nsima; ee, oyo wana azali mwana na Nzambe te, bomoni. Mwana na Nzambe atálaka sémba na Kalvari, mpe ayebaka ete ezali mpo na bolamu na ye.

<sup>70</sup> Na bongo, na ntango yango mpenza wnana nde kotomboka monene eyaki, na Yisraele. Ntango bato bakomaki ebele, na bongo bato bakómaki kokweya na ngambo moko mpe na ngambo mosusu. Na nsima, na masolo na bango: “Ee, ekozala malamau tózala lisusu kuna na Ezipito. Milimo na biso ebayí lipa ya

mpamba oyo.” Na elobeli mosusu, soki nazui yango sikawa na ngámbo ya histoire, yango nde oyo bazalaki koloba.

<sup>71</sup> Sikawa na mikolo ya lelo, elingaki kozala: “Oh, mikolo ya misato nyonso na mpokwa, liyangani ya mabondeli! Mikolo ya Lomingo nyonso na ntongo, kozonga lisusu na losambo! Toyokaka nini? Makambo kaka moko; motei atelemaka mpe ateyaka; toyembaka banzembo; mpe tozongi.” Bomoni, na ntango wana, bozali kosala kaka mpo bosengeli kosala yango. Ozali na yo mosambeli te. Mosambeli akendeke kuna mpo na kosámbe, mpo na komonisa makanisi na ye moko liboso na Nzambe na ye, mpe na kosánzola Nzambe mpo na bolamu na Ye; na Liloba nyonso, ye akangamaka na Yango.

<sup>72</sup> Ezali kaka lokola likambo ya bolingo. Soki ozalaki kobima ná elenge mwasi moko mpo oyebaki ete ezalaki esengisi, to ozali kobima ná elenge mobali moko, ntango ozalaki elenge. “Mama alingi ete ná bimaka ná elenge mobali oyo, kasi nakokoka na ngai kozala ná ye te.” Okozua eloko moko te epai na ye, soki ayei kotala yo. To, soki ezali ndenge moko mpo na elenge mwasi epai na elenge mobali, to elenge mobali epai na elenge mwasi. Soki obimí ná elenge mwasi yango, azolembisa yo; mama alingi ete óbima ná ye mpo azali lolenge ya mwasi oyo mama alingaka. Bomoni, ezolembisa yo; bolingo ezali te. Kasi ozali na yo kokipe te, olingi kopetola nzoto te, olingi kokende kotala ye te. Mpe ezali . . . Ee, ezali likambo moko ya nsómo. Mpe ntango ye mobali azali koya kotala yo, oh, olingi ete ásala noki, ázonga epai na ye.

<sup>73</sup> Ezali ndenge moko ntango olobaka: “Mpo na nini atéyaka ntango molai boye? Ezali na ntina nini makambo nyonso *oyo*, ná nyonso wana?” Bomoni, bolingo ezali na yango te.

<sup>74</sup> Kasi na ntango oyo okangamaka mpenza na Liloba moko na moko, ndenge Molimo akebisaki bino na ntongo oyo, bomoni: “Kokangama na Liloba moko na moko.” Yango ekokaki kozala likambo oyo Autaki koyebisa bino. Kotelema ngwi! Ezali Bomoi na Seko, Liloba na Nzambe moko na moko. Ezalaka esengo, kokende na losambo, ata ndenge nini. Ézala molunge, malili, kozanga kolandela, ézala bato bazali koswána, koyimayima, ata soko likambo nini bazali kosala, ezalaka ntango nyonso esengo, koyoka Liloba ya Nkolo. Na ntango wana nde ozali na bolingo ná Klisto, bomoni, okolinga kokende na losambo.

<sup>75</sup> “Ee, molingami, tokómi lisusu mokolo ya Lomingo na ntongo, nabanzi ete tosengeli kosukola bana mpo tókende kuna. Oh, elembisaka ngai!” Bomoni, ozali na yo na bolingo te.

<sup>76</sup> Kasi soki ozali mpenza na bolingo, okokoka kozela te, kino mokolo ya Lomingo na ntongo ékóma, okozala na mposa makasi ya kokóma kuna kozala elongo ná bango. Mpe tokei, mpe mpo na kobima . . . Bato na Nzambe, bakotungisa yo te. Ee, bazali—bazali bandeko mibali mpe bandeko basi. Ndenge nazaláká koloba: “Okokóma na kilo mingi lokola potopoto ya sukali ya

sorgho na ntongo ya malili.” E—esopanaka te, ekangamaka, boyebi, esimbaka mpenza. Sikawa, ezali elobeli moko ya makasi, kasi ezali—e—ezali mpo na koluka kotalisa bino oyo nalingi koloba, bomoni. Bokangani makasi elongo. Mpe wana malili ezali kokóma makasi, bango mpe bazali kokangana makasi. Esengelaki kozala mpe bongo ná biso. Wana malili . . .

Ntango baninga ya mokili batiki yo,  
Kangama ná Ye makasi koleka!

<sup>77</sup> Mpe bolingo oyo tozalaka na yango bamoko na bamosusu, ezali te mpo tozali bato minene; kasi Klisto oyo azali kati na moko moko na biso nde tolingaka, bomoni. Nzambe oyo azali kati na biso nde tolingaka. Sikawa tolingaka kosangana elongo. Tozaláká koyemba loyembo ya kala oyo:

Ekanganelo oyo esangisi mitema na biso  
Na bolingo ya Baklisto épambolama;  
Boyokani na bandeko  
Ezali lokola oyo ya Likoló. (Bomoni?)

Boyokani na bondeko na makanisi  
Ezali lokola oyo ya Likoló.

Liboso na Ngwende ya Tata na biso,  
Tozali kosopa mabondeli na biso;  
Nsómo na biso, elikia na biso, ntina na biso  
ezali moko,  
Bomengo mpe mitungisi na biso.

<sup>78</sup> Bomoni? Iyo, misie! Ntango moko azui lipamboli, biso nyonso tosepeli na yango. Ntango moko azali na mawa, tozali na mawa elongo ná ye. Bisu nyonso to—tolingaka kozala elongo. Sikawa ndenge wana nde tosegeli kozala.

<sup>79</sup> Mpe ndenge wana nde Yisraele esengelaki kozala. Kasi ekómaki mokumba: “Oh, mwa lipa ya mpamba oyo!” Lipa ya Banje: “Ee, lipa ya mpamba oyo tokosala na yango nini? Milimo na biso ebayí bilei yango! Mpe makambo nyonso ezali kotambola malamú te. Mpe—mpe mwa mána oyo ekwéyaka mpokwa nyonso, ee, ekozala kutu malamú tólia na biso áyi ná pwaró ya Ézipito.” Bomoni, mitema na bango ebélémaki te mpo na mobembo.

<sup>80</sup> Mpe soki mobali moko to mwasi moko abandi komilelalela na ntina na kokende na losambo, bakómi kolemba mpenza mpo na kokende na losambo, babelemi te mpo na mobembo. Ya solo. Eloko moko ezali kotambola malamú te esika moko.

<sup>81</sup> Oh, ntango olingi Nzambe, mpe ozokanisa ete ozokende na Lola, mpe bino nyonso bokokende elongo:

Oyo nde boyokani na bandeko, oyo esengo ya  
Nzambe,  
Koyékema na loboko ya seko;

Oh, kimia oyo epambolami na Nkolo na ngai  
 ebelemi mpenza,  
 Koyékama na loboko na Ye ya seko.

Oyo nde . . . Toyémbaka banzembo yango.

Tokabolaka mawa na biso,  
 Tomemaka mikumba na biso elongo;  
 Mpe mbala mingi mpo na bamoko ná  
 bamosusu  
 Totangisaka mpisoli ya kokabola mawa.

Ntango tokabwanaka,  
 Esálaka biso mpasi na motema;  
 Kasi tokozala ntango nyonso elongo na  
 motema,  
 Mpe na elikia ya kokutana lisusu na liyangani  
 ya ntango ya mabondeli. (Iyo, mesie, kaka  
 kosangana na motema!)

<sup>82</sup> Sikawa, obandi komilengela mpo na mobembo, bomoni, obelemi mpo na kokende na Mboka ya elaka. Bantango ya mimekano, wana nde esika ya likáma; lisobe, bantango ya mimekano.

<sup>83</sup> Yisraele, na ntango na ye ya momekano, babandaki koswána mpe kowélana bamoko na bamosusu, mpe kobóya kolia mápa yango. Mpe bakómaki na mposa ya kozonga na Ezipito.

<sup>84</sup> Na nsima bakómaki koyimayima mpo na mokambi na bango. Oh, bazalaki kobanga ete azalaki kobungisa bango nzela; nsima na ye komitalisa ete azalaki mokambi, mpe Nzambe asilaki kotalisa polele ete azalaki mokambi. “Ee, ntango mosusu tosili kosala yango na ndenge ya mwa bilandalanda. Mpe—mpe ntango mosusu tosili kolanda nzela ya mabe,” to, eloko moko ya ndenge wana, bomoni, bakómaki koloba mabe mpo na Nzambe ná Mose, Nzambe ná mokambi na Ye.

<sup>85</sup> Sikawa soki tokómi na esika ya koloba: “Nayebi te soki Liloba elingi koloba *Boye*, to te,” mpe, “mpo na Molimo Mosanto, nayebi te; nazalaka mwa moke na ntembe na ntina na Yango. Nayebi bato mosusu oyo bazali na yango te.” Ee, kende na yo na Ezipito. Bomoni?

<sup>86</sup> Kasi soki okani mpenza kotikala na nzela, kangáma mpenza ná Mokambi oyo, Molimo Mosanto, kangáma mpenza ná Liloba. Mpe soki okangami na Molimo, Ekobatela yo na kati ya Liloba. Ya solo. Ekomema yo sémba na molongo, na nzela moke ya Liloba. Mpe kobánga Yango te. Ekosala yo mabe moko te, Ekosunga yo nde, soki omisali mpasi. Ekobikisa bampasi nyonso, Molimo Mosanto ekosala yango.

<sup>87</sup> Sikawa tomoni ete, na nzela oyo, nsima na bango kokóma ndenge wana, bakómaki na esika oyo babengi Olébe. Mpe O-l-é-



b-e, Olébe, na bongo tomoni. . . Tólimbola nkombo yango. Ezali ete, li—liloba oyo *Olébe* elingi koloba “esika ekaúká” to “esobe”

<sup>88</sup> Ntango tokabwanaka bamoko na bamosusu na lingomba, mpe tokabwanaka ná Molimo Mosanto, ememaka biso na esika ekaúká, esobe, eloko ya bomoi ata moko te, biloko nyonso ezalaka na nzube. Bomoni, e—esobe, mwa nzete ya cactus oyo etóndá na nzube. Boyebi oyo yango ezali? Ezali mwa lokasa ya motuya, ya petepete, oyo ezángá kozua mai, emilíngalínga makasi mpenza na lolenge ete ekómi nzube. Mpe soki omoni moto moko ya ndenge wana, ntango mosusu azali na elimo moko ya motuya oyo, soki bakokaki komwangisa mai likoló na yango, elingaki kozala mwa lokasa moko ya petepete to eloko ya ndenge wana. Kasi na esika ya oyo wana, emilíngíngi kino ekómi nzube, kotúbáká biloko nyonso, boyebi, komonáká mbéba. Eloko bobele moko oyo esengeli na yango ezali kaka mai. Esili. Esengeli bobele na—na kolamuka, to kobúkama, koyeisama sika na Nkolo. Eko—ekomifungola, soki bopesi yango kaka mai.

<sup>89</sup> Kasi, yango wana baoyo bafándaka na bisika ya ndenge wana basengeli koyika mpiko na lolenge ya bisika yango. Mpe baoyo balingaka kobika kati na loyenge ya ndenge wana, esika oyo ntango nyonso ezali kaka kotúbana ná koswána, kowélana mpe koluka makambo ya ndenge wana, ee, bokobika kaka na loyenge wana, esili. Kasi tozali na ntina ya kobika kuna te, ezali na ntina te ete tótíkala kuna.

<sup>90</sup> Sikawa, Olébe yango ezalaki esika oyo Nzambe alembáki libota yango, mpo kuna nde esika batángwaki mpe bakómaki na lolenge wana. Mpe Amemáki bango kino wana, mpo balingaki kotambola na kati ya nzela yango te. Batángwaki mosika na—na nzela ya liboso, bakendeki na nzela oyo ya mopanzi. Na bongo esálaki ete Nzambe ásala likambo moko oyo ezalaki nsómo. A . . . Esalaki ete Nzambe átinda Mose ete ázua lingenda ya kosambisama, oyo asámbisaki ekólo ná yango, mpe ábeta Libanga, mpo na kobimisa mai.

<sup>91</sup> Sikawa, ezali na liteya moko kitoko awa, soki tokokaki bobele kosósola yango, bomoni. Mpe lokola tobimaka mingi na nzela, mpe tokangamaka na mokili, ná makambo ya bongo, yango esalaki ete Nzambe ázua bakosámbisama ya mokili mpe ábeta Mwana na Ye Moko ná yango, na Kalvári, mpo biso tókoka kozala na bonsomi. Bomoni eloko nini nalingi koloba?

<sup>92</sup> Sikawa, mpo na komema bato yango na mai, nsima na bango kokóma kuna, esika ekaúká yango ekómaki Kalvári. Mpe kuna, Nzambe ayébisaki Mose, Alobaki: “Kamáta língénda ná bampaka, mpe kende liboso, Ngai nakotelema likoló na Libanga liboso na yo.” Mpe Libanga oyo ezalaki Klisto. Mpe Mose, ná lingenda oyo asilaki kopesa na yango etumbu na ekólo ya Yisraele, azuaki lingenda yango moko mpe abétaki kosambisama

ya Nzambe likoló na Libanga yango. Bomoni? Atiaki masumu ya bato likoló na lingenda oyo. Elingi koloba, asengelaki kobeta bato. Na esika ya kobet bato, abetaki Libanga. Mpe Libanga yango, na nzela ya mosala ya Nzambe, ememaki lobiko, ememaki mai na libota oyo elingaki kokufa. Epesaki bomoi na libota oyo ezalaki kokufa. Yango nde Nzambe asalaki na kokamatáká lingenda na Ye—nzete na Ye ya kosambisama, mpe kozingakáká masumu na ngai mpe masumu na bino nzinganzinga na lingenda oyo; na ntango oyo esengelaki kobeta biso, kasi ebetaki Klisto; ete, uta na Ye, *mai* ébima, elingi koloba “Molimo,” Molimo Mosanto ebimaki uta na Ye, mpo na kopesa biso Bomoi. Sikawa tozali na Bomoi na Seko. Sikawa, Libanga yango ezalaki Klisto. Sikawa tolingi kotala malamau.

<sup>93</sup> Nasilá komona ba-dessin mingi ya bato na mayele ya Libanga yo. Nauti komona moko ya ndenge ya litió koleka mpenza, eleki ntango molai te, ezalaki na li—libanga moko ya moke likoló na mwa ngomba moko. Mpe—mpe ezalaki lokola ete Mose asílaki kobéta libanga yango, mpe Yísraele azalaki kuna na nsé, ná kópo ya tíi, azalaki kozua mwa matangá ya mai oyo ezaláki kotanga uta na libanga yango. Sikawa, oyo wana ezali na tango likanisi ya moto moko.

<sup>94</sup> Kasi ntango Libanga yango ebimisaki mai na Yango, bato bazalaki mingi, koleka milió mibale, zángá kotánga bangómbe, bakaméla, ná bamosusu nyonso oyo bamelaki kati na bambeki ya mai oyo eutaki na Yango. Ezalaki liziba ya kopunjapunja na mai nde ezalaki kobima kuna!

<sup>95</sup> Lolenge wana nde bakoluka kotálisa Klisto, Molimo Mosanto lelo. “Ezali na yango kaka mwa mai ya komwángisa.” Bomoni, mwa moke kaka mpo na kondimisa bino ete Nzambe moko azalaka. Te.

<sup>96</sup> Ezali ebele ya Mai mpenza! Dawidi alobaki: “Kopo na ngai etondi meké!” Ezali etóko oyo ezali kobimisa Molimo Mosanto.

<sup>97</sup> Bato babángaka Yango. Bato mosusu balobaka: “Ee, nazobanga kaka mwa moke ete násala *oyo to oyo wana*, to soki esalemi ete nakei mwa mozindo koleka. Nakoki kolakisa yo moto moko oyo akendeki mwa mosika mpenza.” Kasi bolobelaka ata moke te moto oyo akendeki mpenza mosika te. Bomoni? Iyo, boniboni mpo na baoyo bakendeki mpenza mosika te?

<sup>98</sup> Sikawa, tosilá kozala na bato oyo bakómaki bato ya nzoto, mpe batambolaki mabe. Mpe—mpe Nzambe te, kasi bato ba. . . Ezali mpo na bokambami ya malamau te, mpe bongo na bongo, nde ememaki bango na nzela mabe, mpe bakotaki na bilandalanda. Na bongo mokili mobimba, zábolo atálisaka bango misapi: “Bomoni yango! Bomoni yango!”

<sup>99</sup> Ee, bótika nátelema awa na ntongo oyo mpe nátalisa mosapi na ba—milió ntuku na ntuku koleka oyo batikalá ata kobanda te. Bolobi nini mpo na bango? Bomoni, bótala lolenge na bango.

Bótala mobali lokola Eichmann lelo, ná mayele ya koleka. . . Balobaka: “Ba-Pantekotiste bazalaka na bomoto te, na bokondé te, mpe batángá te,” mpe bongo na bongo ndenge wana. Bótala Eichmann, moko na bato oyo batángá mingi koleka na mokili mobimba. Abomáki milió motoba ya bana, ná basi ná mibali, milimo ya bato milió motoba. Bolingaka kolobela moto ya ndenge wana te.

<sup>100</sup> Kasi mwa moto oyo azokoka mpenza kotángá te, oyo ntango mosusu atángáki mabe nkombo moko ya Biblia, mpe, to ntango mosusu alobaki likambo moko to asalaki likambo moko ya mabe, to asalaki libunga moko, bazulunále ekolonga kokoma yango bisika nyonso, mpe koloba: “Esengeli kotiela bango motema te.”

<sup>101</sup> Na bongo, soki bakoki kotiela yango motema te, mpo na nini te kotia motema na kelasi, ná makambo mosusu ná bato ya mayele oyo bazali na bango lelo? Bótala Adolf Hitler. Bótala bato ya mayele mingi ya mokili lelo. Bótala bango. Lisese ya kala oyo elobá: “Oyo ya malamú mpo na moto moko ezali mpe malamú mpo na moto mosusu.”

<sup>102</sup> Eloko oyo osengeli kosala ezali ete ózala na makoki, na nzela ya Molimo Mosanto, ya kosala bokeseni kati na malamú ná mabe, mpe kopona kati na malamú ná mabe.

<sup>103</sup> Sikawa, tomoni ete Kalvári oyo bazalaki na yango, ná mai ya bomoi ezalaki kopunjapunja mpo na libota.

<sup>104</sup> Sikawa, bato mosusu bakanisaka na mitema ná makanisi na bango, ete Yisraele mobimba bamelaki, na nsima batiáki mikumba na bakaméla mpe batiaki bikanganelo na bampunda na bango, ná nyonso wana, mpe bazuaki bana na bango mpe bakóbaki mobembo kino na esika mosusu, mpe batíkaki Libanga yango kuna, kokoba kotangisa mai. Ezali lokuta.

<sup>105</sup> Libanga yango ezalaki kolanda bango, mpe mai yango ezalaki kolanda bango. Sikawa na Bakolinti ya Liboso, mokapo ya 10, nabanzi, na molongo ya 11, bokoki komona yango, ete “Libanga yango ezalaki kolanda Yisraele.” Bipai nyonso bazalaki kokende, kobanda wana, Libanga yango ezalaki kokende elongo ná bango, mpe mai ezalaki kolanda bango.

<sup>106</sup> Etaliseli kitoko mpenza, mpe e—etémelo mpe lóngo ya kitoko mpenza mpo na mondimi lelo, oyo ayebi ete Libanga oyo ebetamaki mbala moko, ete Mai oyo ebimaki mbala moko na Kalvari, ekendeke elongo ná biso bisika nyonso oyo tozalaka! Oh, la la! Ezali te likambo ya kozonga na esika moko boye, mpo na koloba: “Ee, tozalaki mpenza na Mai liboso na lobi, kuna.” Tozali na Máí lelo, awa mpenza, mpo Libanga yango ezalaki Klisto! Mpe Klisto azali ndenge moko lobi, lelo, mpe libela.

<sup>107</sup> Bomoni, Libanga yango ezalaki kolanda Yisraele. Bango bazalaki kolanda Libanga yango ata moke te, kasi Libanga yango nde ezalaki kolanda bango. Amen. Yisraele akóbaki mobembo na bango. Bazalaki bobele na likambo moko ya kosala,

ezali, kotambola sémba, sémba mpenza kino na mboka ya elaka. Mpe Libanga ná mai yango ezalaki kolanda bango.

... *Libanga ezali kolanda bango*: . . .

Bakolinti ya Liboso elobi bongo, mokapo ya 10. Malamu.

... *Libanga yango ezalaki Klisto*.

<sup>108</sup> Nzambe azuaki kosambisama ya libota mpe atiaki yango likoló na Klisto, mpe Abetaki Ye. Bomonaki ete lidusu moko ezalaki na kati ya Libanga yango, kobanda wana? Libanga yango ezalaki na lidusu na kati na yango, epai Mose abetaki. Mpe Klisto azalaki na lidusu, ntango Abetamaki: “Azokisamaki mpo na masumu na biso, mpe na mapipi na Ye biso tobíkísamaki.” Úta na Bomoi wana nde Mai ya Bomoi ebimaki, oyo tozali kosepela na yango lelo!

<sup>109</sup> Sikawa, mpo na kozua Bomoi oyo, bómikanisela, Bomoi ya Klisto efandaka ná Lingomba. Aleluya! Oh, soki tokokaki kofandisa makanisi na biso wana, na miniti zomi oyo ekolanda! Klisto atíkaka Lingomba te. “Nakozala elongo ná bino ntango nyonso, kino na nsuka ya mokili.” Bato nde batíkaka Klisto, Klisto atíkaka bato te. Bato nde batikaka Yango, na kozanga kondima na bango. Bango batikaka Klisto, Klisto atíkaka bato te.

<sup>110</sup> Yisraele nde atíkaki liziba yango, liziba etíkaki Yisraele te. Bomoni? Mpamba te, Biblia elobi polele ete: “Libanga ná mai ezalaki kolanda Yisraele.” Ezalaki kolanda bango! Bipai nyonso bazalaki kokende, Yango mpe ezalaki kokende kuna.

<sup>111</sup> Oh, nakosepela, na ntongo oyo, soki tozalaki na ntango, kozua mokapo ya 1 ya Yosua, epai Alobaki: “Bisika nyonso matámbe ya makolo na bino ekonyata, Napesi bino yango. Bipai nyonso okokende, Nkolo Nzambe na yo akozala elongo ná yo. Kobanga moto moko te. Zala na mpiko! Bisika nyonso matambe na yo ekonyata, Nakozala wana elongo ná yo, ézala wapi.” Nzambe kokendéké elongo ná Yoswa!

<sup>112</sup> Nzambe yango moko azali kokende elongo ná Lingomba na Ye na ntongo oyo. Tika ete tómela longwa na Liziba this, ezali kuna. Bipai nyonso oyo okotia litambe, na esika yango nde Nzambe akozala ná yo, mpo na kosopela yo mai mpe kopesa yo Bomoi. “Nakozala na yo ntango nyonso, kino na nsuka ya eleko.” Klisto ndenge moko lobi, lelo mpe libela. Mibeko ya Nzambe.

<sup>113</sup> Sikawa bokoloba: “Na bongo, Ndeko Branham, mpo na nini tosálaka te makambo oyo tosengelaki kosala? Mpo na nini makabo na biso ná nyonso oyo ezalaka na lingomba, ekómaka na esika na yango te, epai esengelaki kokóma? Mpo na nini lingomba na biso etombwamaka te teee na esika oyo esengelaki kozala?” Bato, na ntango ya mimekano, batángwaka lokola Yisraele. Bakanisaka ete Nzambe asili kotika bango.

114 Kasi, bóbosana te, Libanga yango etikálá kotika Yisraele te. Yisraele nde etikáki Libanga, babosanaki ete Libanga yango ezalaki ntango nyonso elongo ná bango. Ezalaki kaka wana, etambolaki elongo ná bango kino na nsuka ya nzela. “Ezalaki kolanda bango.” Ezalaki mosika te mpo na koloba. Ezalaki mosika te mpo na koyoka. To ezalaki mosika te mpo na komona.

115 Ezali mpe bongo na Klisto! Ná Lingomba lelo, Azali mosika te mpo na koloba. Bamosusu kati na bino basili kozonga nsima, mpe basili kosala makambo ya mabe, mpe basili kobungisa esengo wana, mpe Mai na bino esili kokauka. Azalaka ntango nyonso mosika te mpo na koloba na yo. Alandaka yo. Ayebaka koningana na yo nyonso ná nyonso oyo osalaka. Azalaka na mposa makasi ya koyóka yo óbenga Ye ete ákóta na mosala.

116 Mpe mosala monene oyo ya ba-Pantekotiste lelo, Nzambe azali kozela bóbenga Ye ete ákóta na mosala. Bozali mosika te mpo na kosolola na Ye. Ata tosalaki mabe, tosumukaki, mpe topesaki Ye mokongo, mpe—mpe tosalaki makambo oyo tosengelaki kosala te, kasi ata bongo Azali elongo ná biso. Klisto alobaki ete Akozala elongo ná biso.

117 Biblia elobaki: “Mai yango ezalaki kolanda bana ya Yisraele.” Ntango bakómaki na mposa ya mai, bayebaki ete mai yango ezalaki mpembeni.

118 Sikawa, makambo yango ekonzamaka na mibeko. Systeme nyonso ya Nzambe elandaka mibeko. Sikawa, tokozua... Tótelema naino mwa moke.

119 Tózua mokili. Ebalukaka, ngonga ntuku mibale na minei nyonso, ezungulukaka na mobimba, na kobonga be mpenza, na lolenge ete... Bisó tokoká ata moke te, ná science na biso mobimba, kosala sáa oyo ebatelaka ngonga na kobonga be. Mbala na mbala, ba-sáa ya malamú koleka oyo batikálá kosala, elekaka to ezángaka miníti mingi na mobu mobimba. Kasi mokili etikálá kozánga te, kasi ezalaka mpenza wana na seconde yango. Ebongaka mpenza be na lolenge ete bato ya science lelo, banganga-minzoto bakoki koyéba mpenza, na mibu ntuku mibale uta sikawa to na mibu ntuku mitano uta sikawa, moi ná sanza ekokutana. Ntango ezungulukaka na ngonga ntuku mibale na minei na yango, mpe ebalukaka na ntango na yango nzinganzinga na nzela na yango mpo na eleko moko, ezángaka seconde ata moko te. Aleluya! Ezalaka ya kobongá be mpenza, mpo etámbolaka kokokana na mobeko ya Nzambe.

120 Bayebaka mpenza ntango oyo mai ya mbu wana ekomata, na miníti yango mpenza, mpo bayebaka ntango nini sánza ekokita. Mpe Nzambe asilá kotiá nyonso na molongo kokokana na mobeko. Soki sánza elali, mai ya mbu mpe ekitaka elongo ná yango. Soki sánza ebimi, mai ya mbu mpe emataka elongo ná yango. Mpe bayébaka mpenza, na kolandana na ntango, ngonga oyo sanza yango ekolála. Bakoki kokoma yango na manáka

mibu ebele liboso na yango, mpe koyeba, miníti mpenza, ntango oyo mai ya mbu ekobanda kokita. Ya solo, mpo lolenge wana nde sánza etámbolaka, mpo etiámá na molongo ya mobeko ya Nzambe.

<sup>121</sup> Mokolo wana, nazalaki mpembeni na Láki Michigan. Mpe nakendeki kino na Láki Supérieur, na ntaka monene ya mai wana, na nzela na ngai kokendéké na Canada. Nazalaki ya kotelema wana, mpe nakanisaki: “Ntaka monene ya mai oyo ezali na ba-kilometre boni?” Bongo, ntango nakatisaki Mich... , to, Láki Supérieur, nakómaki kino na Michigan, ekoki kozala na ntáka ya mai ndenge moko. Mpe kino wana, longwa na Láki Supérieur kino na Láki Michigan, longwa na Láki Michigan kino na Láki Ontario, mpe kaka... mpe oyo ya Huron, mpe ba-láki nyonso wana elongo. Ba-tonó nkiasa na nkiasa na nkiasa, mpe ba-baril ebele ya mai ya peto boni, ezali na kati ya ba-láki yango!

<sup>122</sup> Mpe kuna na Nevada, mpe na Arizona, na Nouveau-Mexique, na Esti ya Californie, ezali na ba-milió ya ba-hectare ya mabelé ekaúká, na móto ya moí. Mabelé yango ekólisaka milóna malamu mingi na lolenge ete soki mai yango ekokaki kokóma na mabelé yango, ekólo oyo ekokaki koleisa mokili mobimba, kozánga ete bato bákufa nzala, mpe biloko mosusu elingaki kotikala mpe kobwakama na mbu. Ya solo! Ba-milió ya ba-hectare oyo elingaki kobimisa ba-tonne mpe ba-milió ya ba-tonne ya ba-mbála ná ba-ndunda ya libóke, mpe madesu ná—ná ndunda ya salade, mpe ba-radí ná ba-celerí, ná ba-concombres mpe biloko ndenge na ndenge. Mabelé yango elingaki kobimisa yango, ezali—ezali kaka na mposa makasi ya mai.

<sup>123</sup> Mpe tala mai yango likoló *awa*, mpe mabelé yango oyo *awa* na nsé. Sikawa tokoki komóna yango, mpe toyebi ete ekosalema, mpo tokoki koyékola mai yango mpe komona ete ezali peto, mpe koyékola mabelé yango mpe komona ete ekoki kobimisa biloko. Sikawa, kotombela nyonso oyo tokoki kosala, ekotikáláká kosangisa yango te. Kasi, mobeko moko ezali, mpe mobeko yango ezali gravitation. Sikawa, soki tosali kokokana na gravitation, tokoki kopesa mai na mabelé wana mobimba, kozua mai na ba-láki wana mpe kosopa yango kuna. Kasi tosengeli kosala kokokana na mobeko ya gravitation. Tokokoka komema yango kuna te na mposa na biso. Tokokoka komema yango kuna te na kobelela na biso. Tokokoka komema yango kuna te na koganga na biso. Tosengeli nde kosála kokokana na mibeko ya gravitation, mpo na komema yango kuna. Nzambe atámbwisaka nyonso na mobeko.

<sup>124</sup> Awa, nazalaki kokanisa, nayebi te soki nasílá koyebisa bino yango, to te. Nazalaki na Kentucky, na bokila ya biséndé, elongo ná Ndeko Wood, eleki pene na mobu moko. Mpe to... Biséndé ezalaki komonana mpenza te, na bongo tokendeki na ndako ya moto moko, mpo tóyeba malamu likambo ya bokila yango. Moto

yango azalaki na mabelé ya ba-hectare ebele, mpe na mabelé yango, ba-nzete ezalaki mingi. Kasi Ndeko Wood ayebisaki ngai, ete: “Moto yango andimaka na ye te. Azali—azali mozangi kondima.” Boye, alobaki ete ayébaki ye, na bongo ye. . . to tata na ye ayebaki ye, alingaki kokende kuna mpo na kosenga soki tokokaki kozua ndingisa ya kosálá bokila.

125 Tokendeki na motuka kino na mabelé ya moto yango. Mpe ye ná moto mosusu, bango mibale basilaki kokóma na mibu ntuku nsambo, bafándaki na nsé ya nzete ya póme moko. Mpe M. Wood akotaki kino epai ya moto yango, mpe alobaki na ye: “Nakoki kosala bokila moke na mabelé na yo?” Alobaki: “Ee,” alobaki, “malamu.” Alobaki: “Ozali Wood oyo wapi? Ozali mwana ya Jim Wood?”

Alobaki: “Ezali bongo.”

126 Alobaki: “Ee, mobange Jim azalaki moto ya bosembo, mpe bongo na bongo.” Alobaki: “Okoki kosala bokila esika nyonso olingi, na mabelé na ngai. Nazali na ba-hectare nkama *boye* awa, sálá ndenge olingi. Kitá na mabwákú yango, na bisika nyonso olingi. Sálá mpenza ndenge olingi.”

127 Ngai nafandaki na kati ya motuka, mpo namilobelaki ete motei ná mozangi kondima bakoyokana te, soki tolingaki kosenga lisungi ya mozangi kondima.

128 Na bongo nsima na mwa ntango, Ndeko Wood alobaki: “Ee, sikawa, nakoki komema mokengeli na ngai? Nabanzi ete ekozala malamau ete áya elongo ná ngai.”

129 Mpe mobange mobali yango abalukaki, lingenda na loboko, mpe alobaki: “Wood, olingi koyebisa ngai ete osili kokweya na nsé mpenza na lolenge ete esengeli na yo komema motei moko bisika nyonso okendeke?”

130 Na bongo, namilobelaki, nsima na yango, ekozala malamau nábima na motuka. Na bongo nabimaki na motuka, mpe nasololaki mwa moke na mobange mobali yango. Mpe ayebisaki ngai nokinoki ete azalaki mpenza na ntina ya batei te, mpo azalaki kokanisa ete bazalaki kolobela makambo moko oyo bayebi na bango yango te.

131 Alobaki: “Balobelaka makambo moko oyo bayebi na bango yango te. Ee,” alobaki, “soki moto asololi na ngai, nalingaka áyeba eloko oyo azali kolobela.” Sikawa, oyo wana ezali mayele malamau. Oyo wana ezali mayele malamau. Alobaki: “Sikawa, soki moto azósolola na ngai, nalingaka te áloba *bilobela-lobela*, kobánzabanza makambo oyo ayebi na ye eloko moko te. Nalingaka áloba makambo oyo ye ayebi eloko nini yango azali kolobela.” Ee, nakumisaki likambo yango. Namemiaki yango kouta na mobange mobali wana.

132 Na bongo nalobaki: “Ee, na ntembe te, moto nyonso azalaka na ndenge na ye ya kokanisa.”

<sup>133</sup> Alobaki: “Motei moko ayáki awa na etúka oyo, eleki mwa mibu, asálisaki mayangani kuna na Acton.” Mpe alobaki: “Motei yango, na mpokwa moko, azalaki mopaya na etúka yango, alobaki na—na mwasi moko oyo azalaki na eyanganelo: ‘Ozali na muswále moko na libenga na yo. Mpe nkombo na yo Mme *Songolo*. Mpe ozali na ndeko na yo moko ya mwasi oyo azali na bokono awa likoló na ngomba. Nkombo na ye *Songolo*. Azali kobunda na liwa, azali na cancer na estomá.’ Mpe alobaki: ‘Kamata muswále yango mpe tia yango likoló na ndeko na yo ya mwasi, mpe yebisa ye: “YANGO ELOBI NKOLO, akokufa te, kasi akotikala na bomoi.””

<sup>134</sup> Alobaki: “Mwasi yango azalaki moninga na biso.” Mpe alobaki: “Tomemelaki mwasi yango muswále yango kuna, to, mobali yango, ah, moto yango. . .” Liboso alobaki: “Mwasi yango, mwasi na ngai ná ngai tozalaki kuna na ntongo wana mpe tosungaki mwasi yango. Mpe azalaki mpenza kobela makasi! Minganga basilaki kolemba ye, eleki ntango molai. Azalaki kobela makasi mpenza na lolenge ete tosengelaki komema ye na kati ya drá, kotombola ye mpo na kofandisa ye na pó ya chambre, mpe kozongisa ye. Kobalola ye na kati ya drá, azalaki mpenza kobela makasi.” Alobaki: “Na mpokwa moko, kuna, makeléle moko eyókánaki lokola moto moko autaki kokufa.”

<sup>135</sup> Ben moto azalaki kuna, ná muswále yango, oyo amemaki kuna. Nabanzi ete ezalaki yo, boye te, Ben? [Ndeko Ben Bryant alobi: “Amen. Amen.”—Mok.] Ndeko Ben nde azalaki kuna, ye moto amemaki muswále yango, mpamba te azongisaki mwasi yango kuna.

<sup>136</sup> Mpe alobaki: “Na ntongo oyo elandaki, mwasi yango akomaki kolia gateau ya pomme bakálinga.” Mpe alobaki: “Asalaka kaka misala na ye moko te, kasi asalaka mpe misala ya mozalani. Akómaki malamú mpenza!” Alobaki: “Sikawa namitunaka mingi. Soki esalemi ete námona motei yango, ye ayebaki eloko oyo azalaki kolobela,” alobaki, “na—nakosepela kosolola na ye.”

<sup>137</sup> Ndeko Wood atálaki ngai, mpe ngai natálaki ye. Nazalaki wana, salité, ná motoki ná bosoto, toutaki kofanda na zamba, ná—ná makila ya biséndé na nzoto mobimba. Na bongo nalobaki: “Ee,” nalobaki, “ezali. . . Olingi koloba ete okokaki kosolola na moto yango mpo áyebisa yo ndenge asalaki yango?”

Alobaki: “Iyo, mesie, yango nde nalingi koloba.”

Nalobaki: “Ee, ezali—ezali likambo ya malamú.”

<sup>138</sup> Nazalaki kolia moko na ba-póme na ye. Ba-nzoi ya mike ezalaki komatela yango kuna, boyebi, na eleko ya automne, na sánza ya Mwambe. Boye, nazalaki na mwa póme yango, mpe nazalaki kolia yango. Mpe nalobaki: “Ezali póme ya malamú mpenza.” Nalobaki: “Nzete yango ezali wana kobanda ntango boni?”



139 “Oh,” alobaki, “nalónaki nzete yango kuna, eleki mibu ntuku misato to ntuku minei, to eloko ya ndenge wana.”

140 “Iyo, mésie.” Nalobaki: “Nalingi nátuna yo motuna moko.” Nalobaki: “Ndenge nini mpenza. . . Namoni ete ba-póme wana esili kokweya uta na nzete wana, mpe nkasa na yango ezali kokweya, nzokande tokómi kaka na katikati ya sánza ya Mwambe.” Mpe nalobaki: “Tozui naino ata mbónge ya mopepe ya malili te, tozui naino ata malili makasi te, to eloko moko, kasi, nkasa yango ezali kokweya uta na nzete yango. Mpo na nini?”

Alobaki: “Mai na yango esili kotika nzete yango.”

“Oh,” nalobaki, “ekei wapi?”

Alobaki: “Ekiti na misisa.”

Nalobaki: “Na bongo, ekotikala kuna na nsé ntango boni?”

Alobaki: “Kino na eleko ya printemps.”

141 Mpe nalobaki: “Na nsima, ekomata lisusu, mpe ekopesa yo lisusu nkasa ya sika mpo ózala na mpio, ná ba-póme ya sika mpo na kolia.”

Alobaki: “Ezali bongo. Ezali mpenza bongo.”

142 Nalobaki: “Ee, nalingi kotuna yo likambo moko, mesie. Olobeli bato oyo bayebaka te eloko oyo bango balobelaka.” Nalobaki: “Okoki kolimbolela ngai Mayele nini oyo esálaka ete mai yango étika nzete yango? Soki étikali kuna na eleko ya hiver mobimba, nzete yango ekokufa. Ekoboma nzete yango. Momboto ya bomoi ezalaka na kati ya mái ya nzete yango.” Bongo nalobaki: “Ekoboma nzete yango. Mayele nini esálaka ete mai ya nzete yango étika nzete yango, ékita kino na misisa, mpe étikala kuna kino na eleko ya printemps, na nsima, émata lisusu mpe ébota ba-póme mosusu?” Nalobaki: “Tiá mai na katini mpe tiá yango likoló na likonzí moko, mpe tálá soki, na sánza ya Mwambe, ekokita na nsé ya likonzi yango mpe soki ekomata lisusu na eleko ya printemps. Bomoni?” Nalobaki: “Mobeko moko ezali, mobeko ya bokeli ezali. Mayele moko boye nde etiaki mobeko yango na molongo. Kaka yango te, kasi kaka Mayele yango moko nde esengeli kotambusa mobeko yango, ete ékitisa mai kino na misisa ya nzete, mpe ématisa yango lisusu.”

Alobaki: “Natikálá kokanisa yango te.”

143 Nalobaki: “Okoki. . . Soki okoki koyeba mokolo moko Mayele oyo esálaka ete mai yango étika bitape ya nzete wana, ékita kino na misisa mpe ézonga, ezali Mayele yango moko oyo eyebisaki ngai kuna na mpokwa wana: ‘Kende kotia muswále wana likoló na mwasi yango.’”

Alobaki: “Yo nde motei yango?”

Nalobaki: “Iyo, mésie, ezali bongo.”

144 Na mobu eleki, nazalaki kuna (asili kokende), mpe mwasi na ye afándaki na ebuteli liboso na ekuke, azolongoláká bamposo

ya ba-póme, ya nzete moko wana. Ndeko. . . Liboso balingaki kobengana biso, bayebaki te soki tozalaki banani. Nakendeki koyebisa ye yango, ete tozalaki na ndingisa ya mobali na ye. Mpe nayebisaki ye yango, alobaki: “Azalaki kotátola Klisto mpenza, liboso ákufa.”

<sup>145</sup> Bomoni, eloko nini esalaka ete nzete yango, Mayele nini ekitisaka yango? Ezali mobeko. Ezali mobeko oyo Nzambe atía na molongo. Mpe mobeko yango ezali mobeko ya Nzambe oyo ekotalela likambo yango. Amen.

<sup>146</sup> Boyebi, ata ogángi ndenge nini mpo na koloba—koloba sikawa: “Te, moi ekongala lisusu te na eleko ya été oyo.” Ekongenga, ata bongo. Ata olobi ete: “Na—na—nakotika te ete butu éyínda.” Ekoyinda, ata bongo. Mpamba te eloko oyo tofandi kati na yango, oyo ebéngámi mokili, ekonzamaka na mobeko ya Nzambe.

<sup>147</sup> Sikawa, bandeko mibali ná bandeko basi, nalingi kotuna bino likambo moko. Na bongo, soki tobotami mbala mibale na Molimo ya Nzambe. . . Nzambe azali na biteni mike ya bolembu te ná biteni minene ya makasi, Azali Nzambe na mobimba! Mpe soki ozalaki na mwa Nzambe moke kati na yo, na lolenge ete Ezalaki kaka elilingi ya mpamba, wana ezali nguya oyo ekoki mpo na kokela mabelé ya sika. Ezali nguya oyo ekoki mpo na kosala sánza ya sika ná systeme ya sika. Ezali Nzambe, mpe ezali makasi! Mpe sika-sikawa, mondimi nyonso oyo azali awa, azali na Bomoi na Seko, elingi koloba, Molimo ya Nzambe kati na yo; Nguya ya kokoka oyo ekosékwise bakufi, oyo ekobíkisa babéli, ekotia minzoto na lolenge esengeli. Kasi yo, ekonzami na mobeko moko, Molimo wana oyo ezali kati na yo. Bozali bana mibali mpe bana basi ya Nzambe. Molimo moko oyo ozali na yango kati na yo ekosekwisa yo moko na mokolo ya lisekwa.

<sup>148</sup> Yesu, ntango Azalaki awa na mokili, ntango Akufaki, elimo na Ye ekitaki na ewelo: “Mpe etéyaki milimo oyo ezalaki na boloko, milimo oyo ezali na boloko, oyo babóngólaki mitema te na ntango ya motema molai na mikolo na Noa.” Nzoto na Ye ekótaki na nkunda. Kasi liboso Ákufa, Azongisaki Molimo na Ye na maboko na Nzambe. Molimo na Ye ekendaki epai ya Nzambe, elimo na Ye ekendaki na ewelo, mpe nzoto na Ye ekendeki na nkunda. Mpe Yesu akokaki koleka na lisékwa te liboso Makomi ékoka kokokisama. Akokaki kozonga te, mpamba te Asengelaki kotikalala na nkunda mikolo misato, moi ná butu. Kasi ntango Likomi ekokisamaki na mobimba, epekiselo yango elongolamaki; Molimo na Ye ekitaki na elimo na Ye, elimo na Ye na nzoto na Ye, mpe Asekwaki.

<sup>149</sup> Mpe ntango tokokufa, milimo na biso ekokende na nse ya etumbelo ya Nzambe; esika oyo ngai nazuaki litómbe ya komona yango, eleki mwa mikolo na ntongo, ndenge boyebi yango, na emononeli, esika oyo Biblia elobeli yango ete: “Milimo na biso

ekokende epai na Nzambe Oyo apesaki yango, mpe banzoto na biso ekozonga na mputulu ya mabelé.” Kasi mokolo moko, ntango Likomi ekokokisama, milimo na biso ekolongwa uta na Nzambe, ekolokota elimo, mpe elimo ekokende na nzoto. Mpe Nguya oyo ekosekwiisa biso, ezali na kati na biso sika-sikawa! Tozali sikawa na bisika ya Likoló. Tozali sikawa kati na Nguya ya lisekwa.

<sup>150</sup> Soki mobeko moko ezalaki te mpo na yango, bana mibali ná bana basi ya Nzambe balingaki kokela mokili na bango awa mpe kokende kobika bomoi na bango kuna. Bozali na Nguya ya kosala yango na kati na bino. Soki ozali na elílingí ya Nguya ya Nzambe kati na yo, ozali na Nguya ya kosala yango. Nzambe azali na nguya nyonso. Bomoni eloko oyo nalingi koloba? Nguya oyo ezali na kati na bino nde ekosala, okoki koloba mpe kokela mokili moko mpo na kofanda kati na yango. Aleluya! Yango mpenza.

<sup>151</sup> Yango nde Nguya oyo ezali na kati na Lingomba sikawa, kasi ekonzami na mobeko moko. Mobeko yango ezali te “kotosa ebele na mibeko.” Ezali mobeko ya kondima. Yesu alobaki: “Nyonso ekoki kosalema mpo na baoyo bandimi.” Soki okoki kondima yango, eloko nyonso oyo Nzambe akokamba elimo na yo kondima, ekómi ya yo. Bisika nyonso matámbe ya makolo na yo ekonyata, na nzela na kondima, Nzambe apesi yo yango. Amen! Ekómi ya yo, ozui yango, soki okoki komona fungóla ya mobeko ya kondima oyo ekofungolela yo yango. Bomoni nini nalingi koloba? Nguya yango ekonzami na . . . Soki ozali mwana mobali ya Nzambe, to mwana mwasi ya Nzambe, yango etikaka yo ata moke te. Ezalaka elongo ná yo ntango nyonso. Kasi, kondima na yo ekendeke mosika na Yango, kasi Yango ezalaka kaka wana. Aleluya!

<sup>152</sup> Ntango obikisami, Nzambe apesi yo kondima mpo ómata likoló na mbindo ya mokili. Kondima na yo elóngaka makambo ya mokili. Kondima na yo ezali nini? Kondima na yo na mosala oyo Nzambe asili kosala na kati na yo, mpo na kokómisa yo mwana na Nzambe. Otiki lokuta, otiki moyibi, otiki masanga, mpo kondima na yo etomboli yo likoló na yango. Amen. Soki osali bongo te, ozali na yo na kondima te. “Mpe na nzela na kondima nde bobikisami, mpe yango, na nzela na ngolu.”

<sup>153</sup> Monene ya kondima oyo okosalela, yango nde monene ya Nguya oyo okoki kozala na yango, mpo Nguya ya kosala Likoló mpe mabelé efandi na kati na yo. Nzambe afandi na kati na bino, mpe bozali bana mibali mpe bana basi ya Nzambe. Amen! Ezali yango mpenza. Kasi, etalaka nde kondima na yo. Yesu alobaki: “Ésálamela yo kokokana na kondima na yo. Soki okoki kondima, makambo nyonso ekoki kosalema. Solo, Nalobi na yo, soki olobi na ngomba oyo: ‘Longwa wana’, mpe otii ntembe te, kasi ondimi ete oyo olobi!”

154 Na bongo tosengelaki kozala bato ya lolenge nini, wana tondimeli Klisto mosikoli monene oyo afandi na kati na biso, Libánga oyo ebétamaki, oyo etíkaka ata moke te Lingomba? “Nazali elongo ná bino ntango nyonso, kino na nsuka ya mokili,” Bozali ya ntango nyonso ya liziba monene ya lobiko ná Nguya oyo esopánaki na Lingomba, longwa na Kalvari, Bozali ya ntango nyonso ya Nzambe na bomoi, Libanga monene oyo ebetamaki mpe ezali kobimisa mai mingi, oyo etámbolaka elongo ná biso na mobembo na biso.

155 Yisraele abungisaki kondima na ye. Babimaki na nzela. Babándáki kolúla banzángu ya misuni. Soki bákangamaka na kondima, mpe bándimaka ete Nzambe akomema bango kino na mboka yango, eloko moko te elingaki kopekisa bango. Basilaki kofungola mbu, basilaki kopesa malózi na banguna na bango, basilaki kobáká bangúná na bango na ekulusu nsima na bango, mpe basilaki kotámbola kino na kati ya mboka yango, kasi ata bongo, bazalaki na kondima ya kokóba kino na elaka te.

156 Yoswa ná Kalebe bazalaki na kondima yango! Balobaki: “Tozali na makoki koleka ya kolónge nyonso oyo ekoya liboso na biso.”

157 Yango nde kókóso ya lingomba. Tokoki kolónge bokono nyonso. Tozali na Nguya kati na biso. Tozali bana mibali mpe bana basi ya Nzambe, eloko moko te ekoki kotélema liboso na biso. Eloko bobele moko, Azali koluka moto moko oyo akondima yango, oyo akondima eloko oyo Nzambe asili kosala mpo na yo. Ezali te *tokozala*; tozali sikawa! Mpe Bozali ya Molimo na bomoi ya ntango nyonso ezali elongo ná biso. Amen! Yango mpenza.

158 Yango nde nalingi koloba ntango napesaki motó ya liteya ya ntongo oyo: *Mai Oyo Ebimaka Ntango Nyonso Na Libanga*. Mai oyo ebimaka ntango nyonso na Libanga ezali awa sika-sikawa, Mai oyo ebimaka ntango nyonso na Libanga oyo ebetamaki na Kalvari. Ntango Molimo Mosanto wana ebimaki kati na Ye na Kalvari, ezongaki na Lingomba na Mokolo ya Pantekote, Molimo Mosanto yango moko ezali awa na ntongo oyo. Mpe Epesi biso elaka!

159 Yango wana, ntango nayáka liboso na babéli, ntango Apésaki ngai etinda kuna, nandimaka yango; Nzambe nde alobaki bongo! Nde ndenge wana bimónoneli eyaka; Nzambe alakáki yango! Nzambe akoki kokosa te.

160 Bóndima yango! Bosengeli kondima yango. Eloko moko esengeli kozala wana, mpo na kofungola epekiselo yango, kofungola eloko yango mpo na kokótisa yo na kati na yango. Oyo tosengeli na yango lelo ezali te kobondela mpo na kobakisa Nguya. Bozali na Nguya oyo ekoki mpo na kosala mabelé ya sika. Oyo bosengeli na yango ezali kondima mpo na kosalela Nguya yango. Oyo bosengeli na yango ezali kokonza bomoi wana, mpe kobika bomoi ya búle mpenza, na lolenge ete ntango osengi

Nzambe eloko moko, oyebi malamumu! Totiáka motema epai na Nzambe, mpo na yango. Toyebi ete, soki tofosi Mibeko na Ye, Akopimela biso eloko moko te ya malamumu, soki totamboli elongo ná Ye. Nzambe azali kotambola elongo ná biso. Oh! la la!

<sup>161</sup> Bazalaki kaka na eloko moko ya kosala. Bazalaki kaka na eloko moko ya kosala, ezali, kotikala sémba na nzela. Ezali te koyengayenga *awa*, mpe koyengayenga *kuna*; kasi kotikala na nzela! Lingomba ezali kaka na eloko moko ya kosala, kotikala na nzela! Bango bazalaki na Likonzi na Móto, oyo bazalaki na yango, mpo na kobátela bango moko na nzela wana bazali kolanda Likonzi na Móto yango. Yango nde ezalaki kokamba bango. Eloko oyo bango bakokaki komona, ezalaki Likonzi na Móto wana. Bamonáká Yango kosala na nzela na Mose, mpe bayebaki ete azalaki mokambi.

<sup>162</sup> Lelo tozali na Liloba. Tozali kolanda Liloba. Mpe tozali komona Liloba kosala kati na bandimi, mpe toyebi ete ezali bongo. Nzambe azali kosala mosala elongo ná biso, kotatoláká Liloba ná bilembo kolandáká! Tokangami na Liloba. Liloba ezali kobota mbuma.

<sup>163</sup> Bakangamaki na Mose. Mpamba te, Likonzi na Móto, Mose nde azalaki kolanda Yango. Mpe bango bazalaki kolanda. Ntango babandáki kotélemela Mose, kolobela Nzambe mabe mpe kolobela Mose mabe, bakómaki koyengayenga ngámbo moko mpe ngámbo mosusu. Mitungisi ekotaki. Ya solo mpenza.

<sup>164</sup> Bisó tokangami na Liloba, mpe Liloba ebataka bilembo. Yesu alobaki: “Bilembo oyo ekolanda baoyo bakondima Liloba.” Bomoni, ekangami na . . . Soki okangami na Liloba, Liloba ekobota bilembo. Kasi, Mose, asalaki nini?

<sup>165</sup> Bayengakiyengaki, mpe basalaki nini? Bayengakiyengaki libanda na nzela, mpe babungisaki liziba na bango ya mai.

<sup>166</sup> Nakanisi ete yango nde lingomba esili kosala lelo. Esili koyengayenga libanda na nzela ya Makomi. Bakyei kokota na ba-isme. Bakei kokota na makambo ya mike-mike oyo basengelaki kosala te. Bandimi makambo. Bandimi makambo lokola Endimeli ya Bantóma. Epai wapi bomoni yango na Biblia? Bandimi ba-katekísimo oyo batángaka. Bandimi badenomination na esika ya kobikela likambo. Bandimi mbote ya loboko na esika ya kobikela mbotama ya sika. Bandimi komwangisa mái na esika ya libatisi na mai. Bandimi lolenge ya mabe: “Tata, Mwana, mpe Molimo Mosanto,” na ntango oyo likambo ya ndenge wana ezalaka te na Biblia. Biblia elobaki: “Na Nkombo na Yesu Klisto!” Likambo ya kosala ezali bobele moko, soki bolingi ete Mai yango moko: bózonga lisusu na nzela. Bózonga na . . . Ye alongwe te; Azali naino wana. Bino nde bondimi bindimeli na esika ya Klisto. Botengani libanda na nzela na loyengé.

<sup>167</sup> Moko alobaki: “Ee, nazali Metodiste.”

Mosusu alobi: “Nazali Batiste.”

Na ntango yango elakisi ete ozali Moklisto te. Tozali ya Klisto! Tozali bato na Ye.

Okoloba: “Ee, soki ngai, Batiste?”

Soki yango nde nyonso oyo yo ozali, na bongo ozali na yo ya Klisto te, ozali Batiste.

Olobi: “Ee, nazali Pantekotiste.”

Soki ozali kaka Pantekotiste na nzela ya denomination, yango nde nyonso oyo yo ozali.

<sup>168</sup> Kasi, soki osili kobikela pantekote! Mpe Liloba ya Pantekote ekobóta kobikela likambo ya Pantekote! Landá likambo moko oyo bayékoli wana basálaki, tikala wana kino ótondisama na Molimo Mosanto.

<sup>169</sup> Na bongo, soki esalemi ete ósala likambo kokesana na Liloba, soki molimo oyo ezali kati na yo ekeseni na oyo Liloba elobi, boye ezali Molimo Mosanto te. Zábolo nde azali komekola Molimo Mosanto. Bomoni esika nini tokómi na likambo yango? Oh, bamosusu kati na biso balobáki minoko na sika, togángáki ná makambo ya ndenge wana, kasi towánganaki makambo nyonso mosusu wana. Totikaki ete nyonso oyo ezalaki na Makomi te ékota na lingomba. Tokómi wapi lelo? Tozóngi na lisobe mosusu, na ebongiseli oyo ekaúká. Tosali ebongiseli, mpe tobúngisi Mai na biso. Yango mpenza nde ba-Pantekotiste basalaki. Ntango babandáki kokóma ebongiseli, ebandáki na kobuka boyokani na bandeko, mpe koloba: “Ee, sikawa, tokoyokana te, soki moto yango andimaka *bongo*.”

<sup>170</sup> Kende liboso, zalá elongo ná ye kino ntango akokóma na Liloba ya Solo, boyebi ya Solo. Ézala eloko nini, tika yango kaka, ata ndenge nini. Kende kaka liboso, zalá lokola bandeko mosusu.

<sup>171</sup> Kasi, oh, tosengelaki komí bongisa, mpe koloba: “Ee, lokola bozali ba-Unitaire te, lokola bozali ba-Binitaire te, to ba-Trinitaire te, to *boye*, tokozala na boyokani ya bondeko ná bino te.” Na bongo, ntango tosali bongo, tosali nini? Tomízongisi lisusu na lisobe. Ya solo!

<sup>172</sup> Kasi, bómikanisela, ntango Yisraele bayengakiyengaki mosika na nzela, nzela ya kokende na mboka ya elaka, Libánga yango etikálá kotika bango te; Ezalaki mpenza wana, ndenge moko ná mai. Pelamoko ná Molimo Mosanto, azalaka kaka wana. Tozali na ntina ya koyengayenga lisusu te.

<sup>173</sup> Sikawa, awa Nzambe azali kolakisa biso liteya moko ya monene. Nzambe azali kolakisa biso liteya moko awa. Klisto abétamaki mbala moko, mpo na kopesa biso kobíkela ya Pantekote, mbala moko mpo na libela. Sikawa, ntango Libánga yango ebétamaki, Esengelaki kobétama lisusu te. Ebétamaki bobele mbala moko.

174 Mose asálaki libunga ntango abétaki Yango mbala ya mibale, elakisaki bolembu ya kondima na ye na ntina na Bolimbisi ya masumu. Kasi Klisto abétamaki mbala moko, toyebi ete Akozala lisusu na ntina ya kobetama te. Ee, Mose azalaki kosala nini? Mose azalaki kokótisa eloko moko ya sika, koluka kosala eloko moko ya sika.

175 Mpe lolenge wana nde bakonzi ya mangomba na biso basili kosala lelo. Basili komeka kosala eloko moko ya sika. “Tokomikómisa ba-Assemblée de Dieu. Tokomikómisa Eglise Pentecôtiste de Dieu. Tokomikómisa Conseil Général. Tokomikómisa *oyo*, *oyo wana* to *oyo mosusu*.” Yango nde oyo Nzambe asálaki te. Oyo wana ezalaki likanisi na Ye te.

176 Klisto abétamaki mbala moko. Yango nde kobíkela ya ebandeli. Yango nde lolenge ya ebandeli. Na Mokolo ya Pantekote, Petelo alobáki: “Bóbongola mitema, moko na moko na bino, mpe bóbatisama na Nkombo na Yesu Klisto.”

177 “Biso tomwangisaka mai na nkombo ya ‘Tata, Mwana, Molimo Mosanto,’ topesaka bindimeli ya ndenge na ndenge mpe makambo mosusu nyonso na ntina na Yango.” Na ntango wana, tobimi libanda na Liloba, kokamwa te ete tózoka kokende esika moko te. Bomoni?

178 Nzambe azali kolakisa biso liteya moko. Mose asengélaki te koloba: “Sikawa tokobanda likambo moko ya sika awa, tokomikomisa ebongiseli mpe tokosála lingomba Katoliko.” Yango nde likambo ya liboso oyo bango basáláki. Te, bongo nsima na mwa ntango: “Ee, tokobanda eloko moko ya sika uta na yango, tokosála lingomba Lutherien.” Bongo ba-Anglican bayáki, mpe na nsima ba-Batiste, ná bamosusu, ná ba-Campbellite, ná Eglise du Christ, ná motemeli-na-Klisto, mpe makambo nyonso mosusu. Bomoni, bango nyonso babandaki kosala bongo, moko nsima na mosusu, moko nsima na mosusu, kosala ba-denomination ná bibongiseli. Ezalaki yango te. Bomoni eloko nini bazali kosala kuna? Bazali kobeta lisusu Libanga, mpo na kobanda eloko moko ya sika. Tozali na bosenga ya malakisi ya sika te.

179 Moto nyonso na Biblia abátisamaki na Nkombo na Yesu Klisto. Moto nyonso na Biblia, oyo azali na Molimo Mosanto, alandaka nzela ya Nzambe, na lolenge mpenza oyo Nzambe asalaki yango kozala. Basalaki ndenge moko. Babikelaki likambo yango moko. Bilembo yango moko ezalaki kolanda bango. Misala yango moko ezalaki kolanda bango. Mpo na nini? Bazalaki kobika na nzela na Libanga. Bazalaki na Mai yango moko.

180 Mpe, lelo, ntina oyo tokómi na bindimeli ná ba-denominations ebele, ezali mpo tozali kobanda eloko moko ya sika. Tozali na ntina ya eloko moko ya sika te. Bózonga nde!

<sup>181</sup> Mose asengelaki lisusu kobeta Libanga te, kobanda eloko moko ya sika. Asengélaki koloba na bango, na ntina na Libanga ya ebandeli. Oh, nabanzi ete bosósoli yango! Mose asengélaki kolobela Libanga ya ebandeli, oyo ebétamaki; kasi komeka kobéta Yango lisusu te, komeka kobanda eloko moko ya sika te, kasi koloba na Eloko yango ya kala!

<sup>182</sup> E Nzambe, sunga ngai! Ata soki nakufi mobola, na eteyelo, nakoloba na ntina na Libanga ya ebandeli! Nakoloba na ntina na kobíkela ya ebandeli. Nakoloba na ntina na Makomi ya ebandeli oyo epesaki bango libatisi ya Molimo Mosanto: “Bóbongola mitema, moko na moko na bino, mpe bóbatisama na Nkombo na Yesu Klisto mpo na bolimbisi ya masumu, mpe bokozua likabo ya Molimo Mosanto.” Mai oyo ebimaka ntango nyonso na Libanga Ezali na biso kino lelo. Ekobimisa likambo moko. Ekomema bimononeli. Ekomema lobiko na nzoto. Ekomema masakoli. Ekomema makambo nyonso oyo bango basalaki.

<sup>183</sup> Ntango Yisraele bazóngaki na molongo ya Makomi, mpe bazóngaki na nzela, bakendeki kino na mboka ya elaka. Kasi ezuaki bango mibu ntuku minei.

<sup>184</sup> Ba-Pantekotiste bakokisi pene na mibu ntuku minei to ntuku mitano oyo bazali koyengayenga kati na lisobe. Bózonga na Libanga! Ezali komonana. Yango oyo, ekomami awa na Liloba. Molimo Mosanto azali awa, kosaláká likambo moko oyo Asalaka ntango nyonso, boye, Mai oyo ezalaka ntango nyonso Ezali awa. Bózonga kaka epai na Yango, bózonga na oyo ya liboso, ya ebandeli. Ezalaki ndenge nini na oyo ya ebandeli?

<sup>185</sup> “Ee, bazalaki kopesana mbote ya loboko ná motei”? Eloko yango ezalaka te. “Bazaláki kobatisama na nkombo ya ‘Tata, Mwana, Molimo Mosanto’”? Eloko ya ndenge wana ezalaka te. Ata moto moko te na Biblia, esika moko te, to libanda, na mibu nkama misato libanda na Biblia, atikálá kobátisama na nkombo ya “Tata, Mwana, Molimo Mosanto.” Ezali endimeli ya Katoliko, matéyo ya Biblia te. Bomoni?

<sup>186</sup> Bazalaki na Molimo Mosanto. Bilembo yango ezalaki kolanda baoyo bazalaki kondima. Ekosála yango lisusu lelo. Libánga yango ezali ntango nyonso na bomoi, kaka ndenge etikálá kozala, Libanga wana oyo ebetami!

<sup>187</sup> Tólobaka te: “Ee, sikawa, bóya kokota mpe kosangana na lingomba na biso ba-Pantekotiste, bókota na bisika na biso ya ba-Pantekotiste.” “Te, bóya kokota mpe kosangana na ba-Batiste, to ba-Methodiste, to ba-Presbiterien, to ba-Katoliko.” Wana ezali nini? Wana ezali kobeta lisusu Libanga yango, komeka kobanda eloko moko ya sika.

<sup>188</sup> Bóyebisaka bango: “Bóbongola mitema, mpe bóbatisama na Nkombo na Yesu Klisto,” mpo na bolimbisi ya masumu na bango, “mpe bilembo oyo ekolanda baoyo bakondima.” Sikawa ozongi na nzela, ozongi na Máí yango moko. Mai moko wana ekopesa



mpio ndenge moko. Ekopesa kosébolama ndenge moko na nzoto. Ekopesa nguya ya kopetola ndenge moko. Ekopesa nguya ya kobikisa babeli ndenge moko. Ekosala ndenge moko na oyo Esalaki na ntango wana, soki tozóngi bobele na Molimo yango moko.

<sup>189</sup> Bomoï oyo ezalaka na kati ya mibimbi ya nzete ya vinyo ekobota vinyo. Soki ebótaki yango na mobu eleki, ekobóta eloko yango moko na mobu oyo. Yango nde mobeko ya Nzambe. Mobeko ya Nzambe ezali ete, soki oyo ezali mobimbi ya nzete ya vinyo, tika yango kimia, ekobota mbuma ya vinyo. Okoki kosangisa yango ná eloko mosusu, kasi na nsima, tika yango bongo, mpe ekozonga mpo na kobota lisusu mbuma ya vinyo ndenge moko.

<sup>190</sup> Boye, biso tosili kosangisa lingomba ná bo-Pantekotiste, ná bo-Batiste, ná bo-Methodiste, ná bo-Presbiterien, ná—ná bo-Anglican, ná lolenge mosusu nyonso ya isme. Mpo na nini botiki yango kimia te? Bózonga na Mobimbi, ekozonga na Nguya yango moko. Amen! Amen! Nasepeli na yango.

<sup>191</sup> “Kobanda eloko moko ya sika.” Tosili kosala ndenge moko. Tóluka kotalisa bokonzi na biso te. “Molakisi *Songolo-pakala* nde mobandisi ya lingomba monene *Songolo-pakala ya boye-na-boyé*.” Ezalaki bongo te.

<sup>192</sup> Yango nde Mose alobaki: “Nakolakisa bango oyo nakoki kosala. Nakobimisa yango, ata bongo!” Abetaki Yango, ebimaki te. Agángaki lisusu makasi: “Nakolakisa oyo nakoki kosala!” Nzambe atáláki likambo na ye mpo na yango.

<sup>193</sup> Bókanisaka te, soki “bokangami kaka na denomination moko boye”. Nzambe akotála likambo na bino mpo na yango. Ezali mpenza ya solo. Bosengeli kozonga na oyo ya ebandeli. Bózonga.

<sup>194</sup> Bósololaka kaka na bato. (Bóyebisaka bango te: “Boya kokóta na lingomba na biso. Bóya koloba endimeli na biso.”) “Bózonga mpe bóbongola mitema, mpe bóbatisama na Nkombo na Yesu Klisto, mpo na bolimbisi ya masumu na bino; mpe bokozua likabo ya Molimo Mosanto, soki mitema na bino ezali sembo. Mpe bilembo oyo ekolanda bandimi. Etóngá moko ya bandimi, bilembo yango ekolanda bango.” Mpo na nini? Libanga, Libanga oyo ebétami, Mai na Ye ya Bomoï ezali kopunjapunja, kosalálá makambo moko oyo Ye asalaki kalakala. Ekoki kopekisa yango te. Oh, iyo.

<sup>195</sup> Bisó tolingaka komitalisa, mpe koloba: “Tozali ba-Methodiste, ba-Batiste.”

<sup>196</sup> Lobá kaka na Libánga, Azali Bozali oyo ya ntango nyonso. Komeka kokóta kati na Yango te. Nakomaki “kokóta” awa. Komeka kokóta na Yango te. Bakótaka na Yango te, ezali likambo ya solo mpenza. Okoki kokóta epai ya ba-Methodiste, okoki kokóta epai ya ba-Batiste, okoki kokóta epai ya ba-

Pantekotiste, okoki kokóta epai ya ba-Anglican, kasi okoki kokóta na Oyo te. Te. Osengeli kotóndisama ná Oyo. Kokóta na Yango te; tóndisama kaka ná Yango. Esili. Ezali likambo ya kotóndisama na nini? Kotóndisama ná Nguya, kotóndisama na Molimo, kotóndisama na Bomoi, kotóndisama na esengo, kimia, motema molai, bobóto, bolamu, Nguya ya Molimo Mosanto na bomoi na yo, mpo Bozali ya seko ezali wana. Bóbosana te.

Nasengeli kosilisa mpo ntango ebandi koleka.

<sup>197</sup> Kasi, bóbosana te, Libanga yango etikaki bango ata moke te. Etikaki bango ata moke te. Klisto mpe akotika biso ata moke te; Klisto alobaki: “Nakozala elongo ná bino ntango nyonso, kino na nsuka ya mokili.” Boye te? Mpe Libanga yango etikalaki ná bango na mobembo mobimba, kobanda na Olébe kino na Nébo. Ezalaki yango. Kino na Yaladene, Ezalaki ntango nyonso wana. E Nzambe, nalingi komona Yango na Yaladene!

<sup>198</sup> Mose, ntango akómaki na Yaladene, Libanga ezalaki ná ye kino na nsuka. Mpe atelemaki kuna na likoló, kotalálá e—etonga ya bato oyo basilaki kozonga nsima mpe batángwaki mosika na Nzambe. Motema na ye ememáki bozito mpo na bango. Mpe abwákaki miso na ngámbo ya Yaladene. Kuna akómaki na Yaladene. Yaladene, ya molimo, nde nazali kolobela. Mpe kuna, azalaki wana, liwa ezalaki kozela ye. Kasi atálaki, mpe na mopanzi na ye, mpe Libanga yango ezalaki wana. Amatáki kaka likoló na Libanga yango, mpe Banje bayaki, bamemaki ye.

<sup>199</sup> “Nakotika yo ata moke te, mpe Nakosundola yo te.” Ata ntango ekómi mpasi ndenge nini, ata tokómi mibange ndenge nini, ata tokokufa liwa ya ndenge nini, bóbosana te, Libanga yango ekozala wana na Yaladene. Ekotika yo ata moke te, to ekosundola yo ata moke te. Bóbósana yango te. Mai oyo ebimaka Ntango nyonso na Libanga yango ekozala na biso bomoi mobimba, mpe ata na Yaladene.

<sup>200</sup> Tógumba mitó. [Ndeko moko apesi liléndisi—Mok.]

<sup>201</sup> Wana Molimo yango azali kosala katikati na biso, Molimo ya Nzambe azali kosala katikati na biso, bato bakoki kozala awa na ntongo oyo, baoyo bayebi Klisto te, mpe bozali—bozali penepene na Libanga yango te, bazali na boyokani na Yango te na ntongo oyo? Kasi boyebi ete Ezali awa. Bótala Yango kosala mosala bisika nyonso, bótala Ye kosala nzinganzinga, bótala Ye kosala likoló na bato. Yango nde Mai oyo ezalaka Ntango nyonso. Yango nde lobiko. Yango nde Molimo oyo azali kotondisa bakópo na bango meké na lolenge ete bakoki lisusu kofanda kimia te, eloko moko esengeli kosálema. Soki oyebi Ye te, okolinga kotómbola loboko mpe koloba: “Bóndela mpo na ngai, Ndeko Branham. Nalingi sikawa koyeba Ye. Nalingi kosolola ná Ye, mpe nalingi koyeba Ye na litondi ya Molimo na Ye. Nalingi koyeba ete Azalaka mpenza mpembeni na ngai, ntango nyonso. Nandimi ete Azali wana. Kasi nalingi kozala na boyokani ná Ye. Nazali

na mposa, mpe nazali na nzala ya Nzambe. Nalingi koyeba Ye malamukoleka”?

<sup>202</sup> Nzambe ápambola yo, mesie. Mpe Nzambe ápambola yo, mesie. Ná yo, ndeko. Yo, iyo, kuna na suka. Awa, madame, iyo. Iyo, madame. Tomoni maboko na bino, Nzambe mpe amoni yango. Nzambe ápambola yo, elenge mobali. Nzambe ápambola yo. Ná yo, madame. Amen. Nzambe ápambola yo. Ápambola yo, ndeko mwasi. Moto mosusu sikawa, na ntango ya kimia oyo. Nzambe ápambola yo, kuna na nsima, elenge mobali.

<sup>203</sup> Bókanisa naino. Bókanisa naino, Mai oyo ebimaka Ntango nyonso na Libanga, Molimo yango moko; ete Agángaki kuna na mokolo ya kosambisama na Ye, ntango Azuaki kosambisama na biso. Mpe fimbo ya nkanda ya Nzambe ebétaki Ye, mpe masumu na bino ezíngamaki na fímbo yango, ebétaki Ye, mpe Makila ná mai na Ye esopanaki longwa na nzoto na Ye. Alobaki: “Tata, Nazóngisi Molimo na Ngai na maboko na Yo.” Mpe na Mokolo ya Pantekote, Eyaki mpo na kotámbola elongo ná biso na kati ya mobembo. Mpe Ezali mpenza penepene sikawa.

<sup>204</sup> Okosepela te koloba: “Natelenganaki mosika na ndako, Nkolo, nazongi na ndako”? Wana tozali koyemba yango, soki okolinga koya na etumbelo mpo na kobulisama lisusu ya elimo na yo mpe, epai na Klisto? Amen.

Natelenganaki mosika na Nzambe, (Mosika na nzela.)

Sikawa nazongi na ndako;

Nzela ya (Kozanga kondima, bomoni.) ntango moali mingi,

Nkolo, nazongi na ndako.

Nazongi na ndako, nazongi na ndako,

Nakotelengana lisusu te;

Fungola mpenza maboko na Yo ya bolingo,

Sikawa, Nkolo, nazongi na ndako.

<sup>205</sup> [Ndeko Branham abandi koyemba na nsé ya mongongo *Nkolo, Nazongi Na Ndako*—Mok.]

<sup>206</sup> Bana mibali misato ya mike bauti koya, mbangu-mbangu, ná mpisoli na miso, bafukami mpembeni na etumbelo. Na ntembe te, balimbisami. Balimbisamaki liboso bátika ata bakiti na bango, ntango mwa makanisi na bango ezuaki mokano. Bapusani kaka mpe bafukami awa, mpo bato báyeba ngámbo oyo bango bazali, na ntango oyo.

<sup>207</sup> Nakanisaki ete bato mosusu oyo bakóli koleka bakolinga kosala ndenge moko, bakolinga kofukama, mpe koloba: “Nkolo, na—natelenganaki mosika mingi na nzela. Natiaki ntembe mingi, mpe mbala mosusu natelenganaki mosika mpe nakweyaki na masumu. Sikawa na—nalingi kozonga liboso ntango ésila koleka. E Nzambe, na—nalingi koya. Nalingi mpenza koya kofukama.” Amen.

208 Sikawa, bana basi misato ya mike, ya Arthur Beam, bazali na molayi ndenge moko tóloba, bayei kofukama awa.

209 Mwana mwasi moko ya moke azali koya, auti kozua leki moko ya sika, ya mobali, na ndako. Mokolo wana, nafandaki kaka; Mme Wood ayaki koyebisa ngai, alobaki ete ndeko mwasi oyo alingaki kokende na lopitalo mpo na kobota mwana. Molimo Mosanto alobaki: “Kende koyebisa bango ete akozala mwana mobali.” Ntango abótamaki, azalaki mwana mobali.

210 Emonani lokola bana mike na ntongo oyo, bana mike ya kelasi ya Ndeko mwasi Arnold nde bazali kobulisa bomoi na bango. Etumbelo mobimba, na loboko na ngai ya mobali, etondi na bana mike.

211 Ekozala malamumu soki toyembi loyembo moko, na etumbelo, mpo na bato mosusu nyonso, mikóló.

Sikawa, Nkolo, nazongi na ndako.

Nazongi na ndako . . . ( . . . ? . . . )

Nakotelengana lisusu te;

Fungola mpenza maboko na Yo ya bolingo,

Sikawa, Nkolo, nazongi na ndako.

212 Tógumba mitó mwa moke, mpo na kobondela, mpo na bana mike oyo.

213 Tata na Likoló, soki lobi moko ekoya, soki Yesu aumeli lisusu mibu zomi to zomi na mitano, bango nde bakozala bilenge mibali mpe bilenge basi oyo bakomema Nsango oyo na bikeke mosusu oyo ekoya. Ntembe ezali te na makanisi na ngai, Nkolo, ete na mikolo nyonso ya bomoi na bango, bakomikanisela ete bayaki na etumbelo oyo. Mpe bazali ba-paúni ya mike, Nkolo. Mwa mitema na bango ya bolenge mpe ya petepete ekweisami na ntongo oyo. Bayoki ata Liteya mobimba te; bautaki kobima na kelasi, koyoka Ndeko na biso ya mwasi Arnold koloba; bayei awa na etumbelo, kopesa Yo mwa bomoi na bango.

214 Sikawa, Tata, nauti kosilisa koloba ete Molimo Mosanto afandaka na kati na biso. Mpe Molimo Mosanto oyo, kondima ná Molimo oyo nde esálaka makambo nyonso. Mpe nandimi ete na ngonga oyo mpenza, Olimbisi masumu nyonso oyo basalaki. Mpe nasengi Yo, na kondima nyonso oyo ezali na motema na ngai, ete Óbatela mwa bomoi na bango na nzela mobimba. Tika ete bátangwa ata moke te mosika na Nzela.

215 Ezali solo likambo moko ya kokamwa. Molimo alobaki na ntongo oyo ete “tokomona likambo moko ya kokamwa”. E Nzambe, soki Otiki kosalela bamosusu, zua bana mike. Ndenge na ntongo oyo, ntango tobengaki bato na etumbelo, ata mokóló moko te ayei, kasi bana mingi ya mike bayei. Nzokande, ezalaki Liteya moko ya nkembo, ezalaki mpasi na kosósola, ata mpo na mikóló, kasi bana mike bayambi Molimo na Yango. Totóndi Yo mpo na bango, Tata. Napesi bango epai na Yo, lokola mosali na

Yo, lokola bilembo ya elóngá ya liyangani oyo; mpo, namikaniseli ete Mai ya Bomoi oyo ebimaka Ntango nyonso ekotiola elongo ná bango na ntango nyonso oyo bakozala na bomoi. Tika ete bázala na kondima sikawa na oyo ezali kosalema, ete Nzambe oyo atelemisaki bango na bisika na bango mpe atindi bango awa, tika ete bázala na kondina na Nzambe wana mikolo nyonso ya bomoi na bango. Tika ete mwa milimo na bango ékambama epai na Yo na mokolo ya liwa na bango; ézongisama na nzoto na bango na mokolo ya lisekwa. Bazali ya Yo, Tata. Topesi bango epai na Yo na Nkombo na Yesu.

216 Wana togumbi mitó. Nakosenga na bana mike nyonso oyo bazali na etumbelo, baoyo bandimi ete Yesu azali Mobikisi na bino mpe ete Ye nde ayebisaki bino, kuna na eyanganelo, ete boya kofukama awa nzinganzinga na etumbelo oyo. Bondimi ete Yesu alingi bino mpe ete alimbisi masumu na bino? Nalingi ete bino nyonso bótelema mpe bótala awa na eyanganelo. Yango, ndenge wana nde bokoki koyebisa bato ete bondimi ete Yesu abikisi bino. Sikawa bótelema, malamú, mpe bótala na ngambo ya eyanganelo. Bino nyonso bana mike ya mibali mpe ya basi oyo bolingi Yesu, bótelema mpe bótala na ngambo ya eyanganelo kuna, bino nyonso.

217 Ebongo mpo na bino bana mike ya basi oyo bozali awa na liboso? Bondimi? Bolingi Yesu? Bana mike ya basi oyo bazali awa, bolingi Yesu na motema mobimba? Ya solo? Bolingi Ye? Olingi Ye, molingami? Bótelema awa, tika ete bato báyeba ete bolingi Yesu. Nzambe ápambola bino.

218 Sikawa tóbaluka na ngámbo *oyo* mpe toyembela bato oyo liboso tóbima: “Yesu alingi ngai! Nayebi yango, Biblia eyebisi ngai bongo.” Bomoni? Tótombola maboko wana tozali koyemba yango sikawa. Malamú, tóyemba yango.

Yesu alingi ngai! Nayebi yango,  
Mpo Biblia eyebisi ngai bongo;  
Bana mike bazali ya Ye,  
Bazali na bolembu . . .

219 Sikawa bótombola maboko . . . ? . . . Bisó nyonso elongo:

Iyo, Yesu alingi ngai,  
Iyo, Yesu alingi ngai,  
Iyo, Yesu alingi ngai,  
Biblia eyebisi ngai bongo.

220 Sikawa bino nyonso bóloba nsima na ngai: Nandimi ete Yesu Klisto azali Mwana na Nzambe. Lelo, nayambi Ye lokola Mobikisi na ngai mpenza. Kobanda lelo, kobanda sikawa, nakolinga Ye mpe nakosalela Ye. Amen.

221 [Ndeko Ben Bryan alobi: “Ndeko Branham, nazali kokanisa bana minei na motema na ngai sikawa. Okolinga kobóndela mpo na bango?”—Mok.] Na ntembe te, Ndeko Ben.

222 Tata na Likoló, mobali oyo amoni bana mosusu wana koya epai na Klisto, mpe abeleli, lokola tata, mpo na bana na ye moko. Mpe Molimo oyo ememi bana mike oyo na etumbelo, tika ete Molimo yango ébikisa bana na ye, Nkolo. Kokisa yango. Topesi bango epai na Yo, Tata, na Nkombo na Yesu Klisto.

223 Sikawa, bino bana mike, wana bozali kozóna na bisika na bino, nalingi ete bato nyonso oyo bazali na molongo wana bápésa mbote ya loboko na bana mike oyo, to básimba-simba bango wana bazali kozonga. Bino nyonso bózonga na bisika na bino, *boye*. Mpe moto nyonso kuna ásimba-simba bana mike yango. Mpe tolingi bino na mitema na biso mobimba. Bozali binama ya Nzoto ya Klisto, bozali mpenza kati na Yango lokola biso nyonso.

Tozali kokende na Siona,  
Siona ya kitoko, kitoko;  
Tozali komata na Siona,  
Engumba kitoko ya Nzambe.

Tóya, biso baoyo tolingaka Nkolo,  
Kotalisa esengo na biso,  
Koyemba elongo loyembo ya boboto,  
Koyemba elongo loyembo ya boboto,  
Na bongo tózingela Ngwende,  
Na bongo tózingela . . .

Ezali mpenza loyembo kitoko! Tótombola maboko sikawa.

Tozali kokende na Siona,  
Siona ya kitoko, kitoko;  
Tozali komata na Siona,  
Engumba kitoko ya Nzambe.

Tópesana mbote ya loboko, wana tozali koyemba sikoyo.

Tozali kokende na Siona,  
Siona ya kitoko, kitoko;  
Tozali komata na Siona,  
Engumba kitoko ya Nzambe.

224 Sikawa tótelema wana togumbi mitó, wana to . . . Béta yango Ndeko Teddy, kaka . . .

225 Nazali na mwa malombo awa, ná matambála mpe biloko mosusu. Ntango mosusu misusu euti ba-mboka ya bapaya. Billy ayebisaki ngai ete bazuaki mwa makolo mibale ya sapáto ya singa, ya mwa bebé moko kuna na Angleterre, ya mokuse *boye*, mwa mwana yango azali mpenza ebosono. Na bongo, tosengelaki mpe kobóndela mpo na yango.

226 Na bongo . . . [Ndeko Ben Bryant alobi: “Ndeko Branham, limbisa ngai ndenge nazali kokata yo, kasi bóndela mpo moto oyo atutaki motuka na biso lobi na mpokwa, na mopanzi ya mobali, na liboso, bondela mpo émonisama. Bondela mpo Nkolo amonisa yango.”—Mok.] Amen, Ndeko Ben, na ntembe te,

nakosala yango. [Ndeko Branham abandi koyemba na nsá ya mongongo *Tozali Kokende Na Siona.*]

227 Wana tozali kotambola, Nkolo, toyebi ete Libanga oyo ebétamaki ezali mpenza elongo na biso, ete Mai oyo ebimaka Ntango nyonso na Libanga ezali kotambola elongo na Lingomba. E Nzambe ya Seko, sopéla biso, na ntongo oyo, kondima na Nzambe oyo azali elongo na biso. Nayebi ete Okosála yango, soki tozui ngolu na miso na Yo, ete Okoki kotiela biso motema mpe kopesa biso Yango. Soki Opesi biso Yango ya mingi, tokoki kosalela Yango mabe, Nkolo. Kasi soki tozui ngolu na miso na Yo, tika ete ésalema.

228 Ndeko na biso alobi ete moto moko atutaki motuka na ye. E Nzambe, toyebi ete moto yango azángi mbongo ya kosálisha misala yango. Nabondeli ete Ósala ete moto yango ándimisama, to eloko moko ya ndenge wana, áyoka mawa mpo asalaki bongo, áya koloba: “Ndeko, nakobongisa motuka na yo, ngai moto nasálaki bongo.” Sungá Ndeko Ben ná balingami na ye.

229 Awa na loboko na ngai nasimbi miswále mpe malómbo, nandimelaka Nzambe wana. Mose andimelaki Nzambe wana, mpe akátisaki mbu. Daniele andimelaki Nzambe wana, mpe abimimisamaki na libulu ya ba-nkosi. Shadrake, Meshake ná Abednego, bandimelaki Ye, mpe ebomaki móto.

230 Polo andimelaki Ye, mpe mokolo moko ntango mayangani ekómaki mpenza matata mpe Polo akokaki kokóma epai ya bato nyonso te, azuaki bobele muswále, alobaki: “Nandimi ete Nzambe azali elongo na ngai.” Atiaki maboko likoló na miswále ná bilamba yango, mpe milimo mabe ezalaki kobima kati na bato, mpe maladi ná makono ezalaki kotika bango. E Nzambe, ngai mpe nandimeli Nzambe yango moko. Tika ete mabe élongwa. Tika ete maladi, makono, mpe mpasi étika bango, Nkolo.

231 Ozali Nzambe moko oyo asololaki na ngai kuna na Likonzi na Móto, kuna na ebale. Yo nde fotó na Yo ezali awa elongo ná ngai, na etutú. Ozali elongo ná biso, Nkolo. Ozalaka ntango nyonso Likonzi na Móto moko wana. Mpe tosepeli na Mai oyo ebimaka na Libanga mikolo nyonso, wana tosangani na Molimo. Na bongo, Ozali awa. Totieli Yo motema, Nkolo. Tondimeli Yo. Tondimi ete Okopakola biso mpe Okosunga biso. Mpo na nkembo na biso te, Nkolo; na ntango wana, tokozala lokola Mose, ntango asálaki libunga. Tolingi kosala likambo moko mpo na kosunga Yo, Nkolo. Yango nde mposa ya mitema na biso, kosunga Yo, soki tokoki kosala yango. Lakisa biso, Tata, nyonso oyo Olingi ete tósala.

232 Mpe sikawa, na mosala ya kondima, napámeli bokono oyo etalisami na miswále oyo, ná malombo oyo. Ekotika bato. Nayebi ete Okosala yango, Nkolo. Nandimi yango, na motema na ngai,

ete Okosala yango. Bíkisa bokono nyonso oyo ezali awa na ntongo oyo.

<sup>233</sup> Bíkisa baoyo batómbólaki maboko, baoyo balobaki ete balingi koya epai na Libanga, mpo na komela Mai. E Nzambe, tika ete báyoka mposa mpenza ya mai lelo, tika ete bomoi ya mungwa mpenza ézala nzinganizinga na bango, na lolenge ete épesa bango mposa ya Klisto. Kokisa yango.

<sup>234</sup> Zalá elongo na biso na mpokwa oyo, Tata. E Nzambe, tika ete náyeba, na nzela na malombo oyo, makambo oyo ezali na mitema ya bato. Soki eloko moko te ezali na mitema na bango, na bongo, Nkolo, pesa ngai eloko ya koteya na mitema na bango na mpokwa oyo.


<sup>235</sup> Pámbola Ndeko na biso Neville, ná mwasi na ye, ná libota na ye; mwa losambo na biso, bayangeli misolo na biso, basungi na biso, bandeko na biso. Mpo Nzoto na Yo na bisika nyonso, zalá elongo ná biso, Tata. Totiki yango na maboko na Yo, na Nkombo na Yesu Klisto.

. . . Siona;  
Tozali komata na Siona,  
Engumba kitoko ya Nzambe.

Sikawa tóyemba yango, mpenza, mpenza, mpo na Ye sikawa. Bomoni?

Tóya, biso baoyo tolingaka Nkolo,  
Kotalisa esengo na biso,  
Koyemba elongo loyembo ya boboto,  
Koyemba elongo loyembo ya boboto,  
Na bongo tózingela Ngwende,  
Na bongo tózingela Ngwende.

Wana togumbi mitema sikawa.

Tozali kokende na Siona,  
Siona ya kitoko, kitoko;  
Tozali komata na Siona,  
Engumba kitoko ya Nzambe. 



61-0723M Mai Oyo Ebimaka Ntango Nyonso Na Libanga  
Branham Tabernacle  
Jeffersonville, Indiana U.S.A.

LINGALA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamú ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)